

廿七  
4


T 2455/17

金史 卷四十二

372

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE  
SEP 20 1932

ChL 2455.17



Harvard College Library Imaging Services <http://imaging.harvard.edu>

弘簡錄卷二百二十三

明刑部員外郎仁和張齋邵經邦學

哈佛大學藏和



皇清翰林院侍講學士四世孫遠平校閱

載紀 金內族三世祖以下諸子

幹帶

斜也

子宗義

幹賽

子宗末附木魯

幹者

孫璋

閣母

子宗敘

吾都補

子鄭家鶴壽

撒离喝

醜漢

撻懶

烏野

子宗秀

掃合

宗雄

子蒲魯虎按答海

阿隣

隈可

世祖第三子幹帶太祖同母弟自幼於眾弟中最愛之年二十

餘從撒改伐留可為裨將議主攻城太祖將至軍迎謂之曰留

可城且下勿惑他議太祖從之眾議乃決幹帶急起治攻具其

夜進兵攻城遲明破之因盡平二涅囊虎路二蠢出路寇盜康

宗二年蘇濱水諸部不聽命令與幹賽幹魯同往治其行次

活羅海川撒阿村名諸部官吏告諭皆至惟含國部幹豁勃董  
不至將兵伐之募軍于蘇濱水幹豁完聚固守攻而拔之進師  
北琴海關登路攻拔泓武城取叛者以歸幹准部狄庫德勃董  
職德部廝故速勃董既至復亡去遇塢塔於馬紀嶺執二人以  
降太祖以事如寧江州欲與偕行辭以兵役久勞未及息遂不  
果往太祖還至來流水忽夢其家有變覺而深念之至則聞已  
寢疾過家門不入徑至其家問疾遂薨年三十四太祖哭之慟  
爲人剛毅果斷服用整肅臨戰決策有世祖風軍旅之事多專  
任之及太祖平遼恨其不及見天會十五年追贈儀同三司封  
魏王諡定肅孫活里甲爲人坦率善修飾海陵惡之誣以與宗  
義謀反殺之

第五子斜也改名杲亦與太祖共母收國元年爲吳勃極烈天

輔元年領兵一萬攻泰州下金山縣降女固脾室四部及渤海  
人遂克泰州移城中積粟於烏林野賑先降諸部因徙之內地  
五年爲忽魯勃極烈都統內外諸軍取遼中京謀知遼人欲焚  
芻糧徙居民遯去奚王霞末又欲窺我兵少則迎戰若不敵則  
退保山西其實皆無鬪志杲乃委輜重以輕兵擊之六年正月  
克高恩回紇三城燧兵聞風不戰而潰遂克中京獲駝馬牛羊  
器甲車兩分兵屯守要害遣使奏捷獻俘詔曰汝等提兵于外  
克副所任攻下城邑撫安人民朕甚嘉之更當熟議見可則行  
如欲益兵具數來上無恃一戰之勝輒自弛慢其善撫存降附  
宣諭將士使知朕意奚王遣騎兵三十餘給以明旦乞降杲信  
之使阿里出等往迎兵乃圍之納合鈍恩等下馬據坂皆殊死  
戰因敗霞末追殺至暮而還宗翰移書請進兵追遼主杲意未

決宗幹勸以當從其策乃約共會奚王嶺始定議出青嶺期羊城濼會軍襲擊遼主由草濼西走其都統馬哥趨撻里撻宗翰遣撻懶往擊兵祇一千杲益之獲遼樞密使得里底節度使和尚雅里斯余里野等使招西京降後叛者不從命諸將力攻取之留守蕭察刺踰城降分遣諸將招撫未降州郡及諸部族復書耶律捏里責以不先稟命上國輒稱大號若能自歸當以燕京留守處之捏里復書昨卽位時在兩國絕聘交兵之際奚王與文武百官同心推戴何暇請命今諸軍已集儻欲加兵未能束手待斃昔我先世未嘗殘害大金人民寵以位號日益强大今忘此施欲絕我宗祀於義何如儻蒙惠顧感恩何已杲復書閣下向爲元帥總統諸軍任非不重竟無尺寸之功欲據一城以抗國兵不亦難乎所任用者前旣不能死國今誰肯爲用而

云主辱臣死欲恃此以成功計亦疎矣幕府奉詔歸者官之逆者討之若執迷不從期于殄滅後已杲因請上親征詔於六月朔旦啓行使馬和尚奉迎于撻魯河上至鴛鴦濼杲上謁上追遼主至回鹵畛川南伐燕京次奉聖州詔自今諸訴訟書付都統杲決遣若有大疑卽令聞奏太祖旣定燕京還次鴛鴦濼不豫還京師以杲從太宗卽位拜爲諸班勃極烈與宗幹俱治國政天會三年伐宋杲領都元帥居京師宗翰宗望分道進兵八年九月辛酉薨皇統三年追封遼越國王天德二年配享太祖廟廷正隆例封遼王大定十五年諡曰智烈子字吉改名宗義天德間爲平章政事海陵尤忌諸子盛強欲盡除之陰使妃父撻不野圖之詳略互見撒離喝傳中坐是子孫百餘人皆被殺惟斜也幼子阿虎里妻撻不野女獨赦其死後封爲王授世

弘簡錄 卷一百二十三  
襲千戶大定初追復宗義官爵贈特進弟蒲馬孛論出阿魯隈  
喝前贈龍虎衛上將軍

第六子幹賽穆宗初幹准部人冶刺海葛安二字董暴其族人  
幹達罕及抄畧阿活里侵及納根涅所部忒石木紇石烈部族  
遣納根涅字董往治涅擅募蘇濱水人爲兵不聽輒攻略之遂  
攻烏古論部敵庫德入米里迷石罕城其人來告時幹賽尚幼  
遣與冶訶往問狀納根涅雖伏不肯償所取因遜去冶訶等皆  
不欲追幹賽督軍而進至把忽嶺西毛密水及之大破其衆納  
根涅死焉還乃撫定蘇濱水阿里民鈍恩皆復其所執涅母及  
其妻子而歸穆宗嘉其能集事器異之康宗四年幹賽將內外  
兵佐以劾古活徐苗蒲察狄古廼以伐高麗使宗人木魯分兵  
爲十隊更出迭入遂大破之適其母和徐隈疾篤召還代以幹

魯未幾復至再破高麗軍與木魯進圍亞魯城克之高麗請和  
盡歸前後亡命及所侵故地退九城之戍遂與之和皇統五年  
追封衛國王 子宗朮本名挑撻長身美髯忠確勇毅天眷初  
預誅宗磐擢寧遠大將軍皇統初充牌印祇候五年出爲趙州  
刺史轉興平軍節度使改大名尹貞元三年歷昭德臨洮二軍  
鳳翔尹大定二年入爲工部尚書性滯不習事與蘇保衡完顏  
余里也遷加代宋士官賞凡與土賊戰者一槩加之世宗惟其  
濫語宰相曰若一槩追還必生怨望其與土賊戰有能以寡敵  
衆一人敵三十人以上者依已遷爲定改同簽大宗正事震武  
軍節度使卒 木魯後從太祖克寧江州收黃龍府出河店達  
魯古城護步荅岡皆力戰有功東京降爲本路招安副使敗遼  
兵破同刮營蘇州漢民叛走木魯追復之以功爲謀克天輔四

年卒年四十一皇統中贈鎮國上將軍

次幹者天會十五年追封魯王正隆例改封公子神土愍皇統六年卒贈驃騎衛上將軍 孫璋本名胡麻愈多勇略通女直契丹漢字年十八元帥撒离喝引在麾下以事如京師見宗弼與語悅之令襲父謀克天德三年充牌印祇候因勸掌中都留守事左衛將軍蒲察沙离只歸世宗不從遂與守城官烏林荅石家奴烏林荅愿徒單三勝蒲察蒲查等以兵晨入府殺沙离只及判官漫撚撒离喝推宗强子阿瑱爲留守璋行同知事遣石家奴三人并中都轉運使左淵子貽慶大典少尹李天吉子磐奉表如東京賀卽位世宗嘉之以三人爲武義將軍充護衛賜貽慶及第授從仕郎磐充閤門祇候就以璋爲中都同知心常不安遂謀爲亂語在可喜傳上誅李惟忠等賞璋爲彰化軍

節度使宋將吳璘出散關據寶雞以西詔璋赴元帥都監徒單合喜軍前任使宋人據原州寧州刺史顏蓋門都攻以兵四千不克宋將姚良輔兵十萬又至權副統完顏習尼列引千騎援門都諸將畏良輔兵多皆不敢戰璋至會平涼涇州潘原長武等戍兵合二萬人使押軍猛安石抹許里阿補兵二千軍於城北習尼列兵三千軍於城西北十里麥子原皆據高阜爲陣璋以本部兵陣於城西良輔出自北嶺先遣萬人攻阿補自引軍九萬陣麥子原下分爲八陣捍以劍着行馬外列騎士步卒居中敢死士鎖足行馬間持大刀爲拒別以騎二千襲璋軍璋遣萬戶特里失烏也以押軍猛安奚慶喜照撒兵二千援阿補遣撒屋出崔尹以兵二千益習尼列阿補與宋人接戰良久敗之宋兵在麥子原者最堅習尼列與移刺補奧屯等各兵五千沿

壕爲伏餘兵皆捨馬步戰擊其前行騎士走之行馬以前衝以  
長槍以後射以勁弓良輔兵稍挫習尼列乘勝麾兵撤其行馬  
遂破七陣良輔復整兵出習尼列少却而璋已破城下宋兵與  
習尼列會整兵奮擊僕根等伏兵皆起大破良輔軍斬首萬餘  
級墜壕死者不可勝數鎗足行馬者盡燬之獲甲矢萬餘器仗  
稱是良輔亦中兩創脫去遂歸原州穴其西城城北宋人宵遯  
璋等入原州璘知京兆尹烏延蒲离黑寧州刺史赤蓋胡速魯  
改已去德順復入據之合喜以璋權都統習尼列權副統將兵  
二萬救德順璋率騎兵前行與璘戰于張義堡遂沙山下敗之  
斬首數十級追北四十餘里遂至德順城東璘據北城險要爲  
營兩軍相遇凡五接戰璘軍敗走璋追至城下璘與其城上兵  
相應以弩夾射璋軍佯却城中出兵來追璋反旆與戰大敗之

合喜遣統軍都監泥河以兵七千來會與璘軍復戰敗之璘遣  
兵據東山堡璋與泥河急擊之習尼列兵復逼東山堡璘短兵  
來拒退走其城北營兵六千來戰璋之漢軍少却傷者二百人  
璘遂焚璋攻具習尼列望見火發亟引將士來赴遂與劉安漢  
軍三百人擊敗之璋率移刺補猛安兵踰北岡璘軍隔壘而射  
移刺補少却璘軍三萬皆走險據作三陣亦環以劍盾行馬璋  
遣萬戶石林迭勒由別路自後擊之特里失烏也移刺補以二  
千人當其前射以強弓璘兵大敗墮溝壑者甚衆璋軍度澗追  
之斬數千級而還合喜再使查刺來問策諸將皆曰宋兵恃險  
不善野戰我退軍平涼彼必棄險來就然後可圖璋曰不然彼  
恃其衆非恃恃險昔人有言寧棄千軍不棄寸土故退兵不如  
濟師我退軍平涼彼軍深入吾地固壘以拒將如之何及合喜

親率兵來赴詰且璘乘陰霧晦冥分兵四道來襲戰于城東離  
而復合者數四漢軍千戶李展率麾下兵先登奮擊璘軍陣動  
璋乘勝踵擊敗之追至北岡璘走險璋急擊之殺畧殆盡宋經  
略使荆阜步騎尚三萬自德順西去璋與尼列以兵萬餘追擊  
之反出其前還自赤霄遇其前鋒敗之復與其中軍戰自日吳  
至暮乃罷阜乘夜來襲營爲退八十里未曉尼列追之璋兵至  
上八節宋兵據險爲陣璋捨馬步戰地險不得接相拒至曙宋  
兵動璋乘之追至甘谷城尼列兵亦至擒宋將朱永以下十二  
人宋兵宵遯璋遂班師尼列追至伏羌城不及而還命轉西北  
路招討使名爲元帥左都監兼安武軍節度使賜以弓矢衣帶  
佩刀加益都尹行至海州宋人棄去得糧三萬六千餘石安築  
其人復其屯戍五年宋人約和罷三路都統復置陝西路統

司以璋爲統軍使久之兼京兆尹名爲御史大夫璋奏竊觀文  
武百官有相爲朋黨者今在臺自臣外無女直人乞不限資考  
量材奏擬上問朋黨爲誰卽糾治之朕遇女直未得其人豈以  
資考爲限論其人材而已十三年改大興尹爲賀宋正旦使至  
臨安宋人請以太子接書不從因就館迫取之且赴宴多受禮  
物上聞之怒欲寘極刑左相良弼奏璋爲將大破宋軍讐之已  
久將因此坑陷亦未可知若遽殺璋墮其計中上以爲然與副  
使客省使高翊各杖除名沒入其所受禮物歲餘復起爲景州  
刺史遷武定軍節度使授山東西路蒲底山峯兀魯河謀克改  
臨洮尹十九年卒

第十一子闍毋始佐斡魯克濬州城中出奔者邀擊殆盡與高  
永昌隔沃里活木衆遇淖不敢進獨率所部先濟諸軍畢濟屯



引簡錄 卷二十三  
東京城下其人來戰破之于首山殲其衆獲馬五百匹拜爲成  
州路副都統令斜葛留兵一千鎮守命以餘兵會于渾河至臨  
潢府先登克其外城又從都統杲至中京由城西沿土河以進  
城中兵三千餘皆不能守遂克之宗翰等攻西京闔毋婁室於  
城東爲木洞以捍蔽矢石於北隅以芻蕘塞其隍城中出兵萬  
餘將燒之溫廸罕蒲匜率衆力戰復却又爲四輪革車高出於  
堞闔毋與麾下乘車先登諸軍繼之遂克西京與遼步騎五千  
戰于朔州之境斬首三百級遼騎三百駐于河陰步兵五千屯  
馬邑縣南復擊破之隳其營壘盡獲車馬器械又以兵三千擊  
遼兵三萬于京西令曰若不勝敵不可以生時以一擊十不致  
之死地不可使勝乃命士卒皆去馬陣于溝塹之間人殊死戰  
遼兵大敗追至其營而止明日復敗七百餘人又討興中府宜

州叛人下詔招諭之曰遼之土地皆爲我有彼雖復叛終皆吾  
民可縱其耕稼毋得侵掠勃堇蒙括斜鉢吾撻等獲契丹九斤  
輿中平拜爲南路都統詔曰回鹘保以烏合之衆保據險阻其  
勢必將自斃若彼不出掠毋庸攻討張覺叛入于宋自錦州往  
討擊走之逐北至榆關復敗之於營州東北欲乘勝進取南京  
以方暑雨逐水草休息使僕虺蒙括兩猛安屯潤州朧州縣不  
得與覺交通九月復破覺將王考古於新安敗其軍于樓峯口  
惟免耳山之戰闔毋大敗太宗使宗望來問狀卽將其軍討覺  
破之太宗乃赦闔毋連破僞都統張敦固遂克南京上遣使迎  
勞命屯兵鎮守令有司運米五萬石于廣寧給南京潤州戍卒  
詔以南路歲饑特許田獵奏宋敗盟有狀使副宗望討伐以其  
屬尊先皇帝任使有功請讓爲都統撒喝副之先鋒渡河圍汴

宋人請盟還與劉彥宗留燕京節制諸軍八月復伐宋克汴州  
與撻懶分擊城中諸軍潰而西出者十三萬人大敗之師還擢  
元帥左都監攻下河間大破宋兵萬餘於莫州宗輔徇地淄青  
又與宗劄分兵破山谷諸屯進克濰州及議伐康王閻母欲先  
定河北然後進討太宗酌取其議使引兵取陝西天眷六年正  
月辛巳薨年四十熙宗追封吳國王配享太祖廟庭正隆改封  
譚王大定徙封魯王諡莊襄 子宗敘本名德壽奇偉有大志  
喜談兵天德二年克護衛武義將軍世襲謀克擢御院通進遷  
翰林待制兼修注轉國子司業兼左補闕正隆初轉符寶郎雖  
除宮職皆帶劍押領宿衛遷太宗正丞母憂起復爲侍衛親軍  
馬軍都指揮使改左驍騎契丹撤八反轉咸平尹兼本路兵馬  
都總管許以便宜乃出松亭關至廣寧間世宗卽位復還與中

見於梁魚務授寧昌軍節度使明年二月契丹來攻自將擊之  
遇騎千餘漢兵百二十皆散走獨與女直渤海三十騎盡銳力  
戰身被三創所乘馬中箭而仆遂爲所執居百餘日盡得賊中  
虛實會有臨潢民移刺阿塔等盜馬授之得脫歸見元帥謀衍  
平章元宜曰賊衆烏合無絕律破之易爾帥府欲授軍職不肯  
受矯取驛馬赴京得名入條陳賊中虛實及謀衍貪吝諸軍進  
退不合事機詔大臣議皆然其言進拜兵部尚書領右翼都統  
率宗寧烏延查刺烏林荅刺撒兵各千人號三萬佐忠義軍至  
花道遇賊與戰會左翼先敗走忠義亦引却獨勒本部遮擊歷  
帳下士三百捨馬步戰賊不得逞大軍整列復至合勢擊之賊  
遂敗去追至七渡河又大敗之賊平入爲右宣徽使宋兵據海  
州將謀深入詔往禦之遷元帥右監軍因駐山東分兵據守要

善敵不得西尋奉詔與左副元帥志寧參議軍事四年入朝奉  
暑月在近頓兵邊陲飛輓頗艱上從其請俟秋涼進發還軍而  
授成算賜襲衣弓矢九月渡淮引兵出唐鄧至襄陽屢戰皆捷  
明年宋人請和軍還除河南路統軍使河決李固渡分流曹單  
之間詔與梁肅往視奏言河道填淤不能受水故有決溢之患  
今欲復其故道卒難成功幸而可塞他日不免決溢山東非曹  
單比也沿河數州驟興大役人心動搖恐宋人乘間扇誘搆為  
邊患遂止不塞十年召拜參知政事上諭曩奏黃河利害甚合  
朕意朕念百姓差調官吏為姦率斂星火所費倍徙委積經年  
腐朽不可復用若此等類百孔千瘡百姓何以堪之卿參朝政  
宜擇利而行以副朕心及與上論南邊事對曰南人遣謀來多  
得我事情我遣謀人多不得其實蓋彼以厚賞故也十一年奉

詔巡邊六月至軍將戰有疾七月病甚遺表朝政得失及邊防  
利害薨年四十六上惜其勤勞國家他人不能及傷悼不已輟  
朝遣敬嗣暉致祭賻銀絹重綵初因宗敘請募貧民戍邊屯田  
給以廩粟使貧者無艱食之患富家亦免更代之勞上善其言  
而未行十七年因語宰臣戍邊之卒歲冒寒暑往來番休馬牛  
往者皆死且奪其農時敗其生業朕甚憫之卿等以何術使百  
姓安于田里而邊圉疆固往歲參政宗敘嘗為朕言此事可謂  
盡心於國今以兩路招討司烏古里石壘部族臨潢泰州等路  
分置堡戍詳定以聞朕將親覽又聞其子孫家用不給詔賜錢  
三千貫明昌五年配享世宗廟庭

長幼子吾都補改名昂為人悖戾嘗從太祖征伐人輔六年  
稍喝以兵四千監護都部降人處之嶺東就以兵守臨潢府昂

不能撫御騷動煩擾降人苦之多叛亡者上聞之使出里底戒諭及過上京諸部已降者復歸遼主惟章愍宮小室韋二部達內地稍喝駐兵不與討襲時太宗居守詔言違命失衆當寘重法若有所疑則禁錮之俟師還定議其副辭不失勸因國慶可薄其罰乃杖昂七十拘之秦州而殺稍喝天會六年昂權元帥左都監十五年爲西京留守天眷三年爲平章政事皇統元年封漆水郡王二年十一月甲寅薨追封郕王子鄭家皇統初以宗室子授定遠大將軍除磁州刺史天德間爲右諫議大夫累遷會寧益都尹安化軍節度使海陵伐宋爲浙東道副統制與蘇保衡以舟師自海道趨臨安至松林島阻風泊島間詰旦舟人望見敵舟請爲備素不曉海路問此去幾何若測以水路且三百里遂不設備有頃風迅卽至擲以火炮顧見左右舟中

皆火發度不得脫赴水死時年四十一 次子鶴壽本名吾都 不累官耶魯瓦羣牧使契丹撒八反使五院部人老和尚率衆來招謝曰吾宗室子受國厚恩寧殺我不能與賊反遂與二子 皆被殺

撒離喝名杲安帝六代孫秦州都統婆盧火之族胡魯補山之 子雄偉有才略世祖養以爲子太祖愛之常令在軍故不隨遷 秦州仍居安出虎水凡宗翰宗望等克汴定河北皆從闍毋攻 下河間雄州李成棄城走杲邀擊大破之雄州遂降宗輔經畧 山東留杲河上真定賊自稱元帥秦王擊破其衆執而戮之又 從宗輔平陝西徇地自渭以西降順德鎮戎軍并涇原路進平 熙河明年同奔覲討平河外降寧洮安隴二寨并降下河及樂 州至西寧盡降其都護官屬其木波族長等皆迎降復攻慶陽

敗其拒者遂降其城慕洵聞之亦以環州來降得城寨十三步  
騎一萬詔書褒美陝西既定留兵屯衝要使總之無何請收劍  
外十三州與宋王彥軍七千遇于沙會灤敗之遂克金州連破  
吳玠諸軍于饒風關取真符縣及洋州入興元府敗玠兵于固  
鎮擒其兩將撒葛祝等盡破宋兵下諸砦及仙人關天會十四  
年爲元帥右監軍宗弼復取河南令自河中出陝西既至鳳翔  
擊走宋軍時宋軍在京西者甚衆諸將以暑雨欲駐軍且聞宋  
兵九萬會于涇州留諸將屯環慶獨引輕騎往取六月敗之于  
涇宋兵走渭州拔离速追擊大敗之未幾爲右副元帥皇統三  
年封應國公賜資甚厚熙宗出獵賜具裝馬二命射于園中加  
開府儀同三司將還軍命宰臣餞之海陵升蒲州爲河中府拜  
爲尹入朝進封國王從行官吏皆官賞之因從容言唐建成不

道太宗以義除之卽位之後力行善政後世稱賢陛下以前主  
失德大義廢絕當如唐太宗則善矣海陵聞其言色變自此忌  
恨念久握兵在外頗得士心以爲行臺左丞相賜玉帶璽書陽  
尊以殊禮陰論右丞相大臬無使臬預軍事臬尚不知始至勢  
孤每事輒爭臬詭曰太師梁王以陝西事屬公以河南事屬臬  
臬爭之不得白於朝大臣希青曰如梁王教帥府令史遙設希  
意誣臬父子并平章宗義尚書謀里野等謀反學臬手署并印  
文詐爲家書與其子御史大夫宗安從左都監奔覩上變有司  
鞫問不服掠笞楚毒宗安神色不變曰今雖無以自明九泉之  
下當有寃對吾終不能引屈與宗義謀里野皆被害遂使廝魯  
渾殺臬于汴族其家親屬坐死者二十餘人遷奔覩元帥左監  
軍開府儀同三司遙設爲博州同知賜錢三百萬大定初詔復

官爵三年追封金源郡王諡莊襄以郡王品秩官爲營葬十七年配享太宗廟庭

世祖曾孫醜漢名衷中都司屬司人祖霸合布里封鄆王父悟烈官至特進大定中衷收克閤門祇候授代州宣銳軍都指揮使歲旱州委禱雨于五臺靈渾步致其水雨隨降人爲刻石紀之四遷引進使兼典客署令改尚輦局使扈從北幸賜廐馬二以旌其勤尋爲夏國王李仁孝封冊使歷寧海蠡州刺史平賦役無擾民頌遺愛入爲大睦親府丞除順義軍節度使陞辭賜金幣特寵異之移鎮鎮西泰和六年致仕卒爲人孝悌貞謹深悉本朝婚禮皇族婚嫁每令相之治復有能大安初追贈輔國上將軍

穆宗子撻懶名昌初從宗翰襲遼主于鴛鴦樂追都統馬哥不

及收其羣牧獲樞密使得里底及其子磨哥那野以還及太祖自將襲大魚濼留輜重于草濼使撻懶牙卯守之奚路險阻經畧爲難兵官渾黜不能安撫其衆命爲奚六路軍帥鎮之時回鹘保部族來附餘衆奔潰命習古廼婆盧火護送赴燕戒以若遇險阻卽分兵以行其後撫定奚部及分兩路遊界表請設官鎮守上依東京渤海列置千戶謀克久之討劾山速古部奚人因據險來戰殺獲殆盡其速古噶里鐵尼十三巖皆平之又遣奚馬和尚攻下品達魯古并五院司諸部執其節度乙列詔以克副所託良用嘉歎建州遙輦昭古牙部族乃遼外戚撻懶擊走之獲其妻孥及官豪之家又擒殺隊將曷魯燥白撒葛降民尸千餘進降金源縣詔增賜銀牌十又降遙輦二部再破興中兵降建州官屬得山砦二十村堡五百八十昭古牙勢蹙亦降

詔第將士功賞撫安新民撻懶請以遙輦九營爲九猛安上以  
奪隣有功使領四猛安昭古牙仍爲親管猛安其五猛安都帥  
命擇人授之撻懶與劉彥宗舉蕭公翊爲典中尹郡府各以契  
丹漢官攝治上皆從之乃以爲六部都統從伐宋已受宋盟還  
軍歸中京八月復征與阿里剌攻杞縣破宋兵二萬覆其三營  
獲京東路都總管胡直孺及其二子并南路都統制隨師元及  
其三將遂克拱州降寧陵破睢陽下亳州宋兵復睢陽又擊走  
之擒其將石瑱大軍北還以爲元帥左監軍狗地山東取密州  
廸虎取單州撻懶取鉅鹿阿里剌取宗城廸古不取清平臨清  
蒙剌取趙州阿里剌狗下濬滑恩及高唐分遣諸將趣磁信德  
進克祁州永寧順安二軍及保州皆降之劉豫以濟南府降命  
撻懶監之以鎮撫東平專決大事加右副元帥天會十五年轉

左副都元帥封魯國王張邦昌被誅詔諸將復求可立者乃力  
舉劉豫及豫廢倡議昇宋以廢齊舊地語載宗舊傳以久持兵  
柄謀反有狀詔以屬尊有大功因釋不問出爲行臺之丞相手  
詔慰遣旣至燕京愈驕肆不法復與翼王鶻懶有謀朝議漸悉  
其與宋交通會復有上變告者方下詔加誅撻懶自燕京南走  
將入于宋追及于祁州殺之并殺鶻懶及宗人活离胡土撻懶  
二子斡帶烏達補而赦其黨與

烏野諱勗字勉道穆宗第五子生而好學國人呼爲秀才年十  
六從太祖攻寧江州又從斡离不襲遼主于石輦鐸太宗嗣位  
自軍中召還與謀政事粘罕等旣受宋降使就軍中勞之問其  
所欲惟好書耳乃載數車而還天會六年詔求訪祖宗遺事  
備國史命勗與耶律廸越掌之勗等採摭遺言舊事自始祖

下十帝綜爲三卷凡部族旣曰某部復曰某水之某又曰某鄉某村以別識之其契丹往來及征伐諸部中間詐謀詭計一無所隱事有詳畧咸得其實上書諫太宗臣聞德莫大於樂天仁莫先於惠下自與高麗議和凡女直入高麗者皆索之至十餘年猶未已然皆前世姦宄叛亡烏蠱訛謨宰阿海阿合束之緒當時壯者皆已物故子孫安於土俗婚姻膠固骨肉乖離誠非衆願國家民物繁夥幅負萬里不知得此果何益耶高麗稱藩職貢不闕民亦非外臣愚謂聖人行義不責小過宜施惠下之仁弘樂天之德聽免徵索從之十五年爲尚書左丞加鎮東軍節度使同中書門下平章事預平宗磐之難賜與甚多加儀同三司以皇叔祖字冠其銜皆力辭不受皇統元年撰定熙宗尊號冊文上召飲於便殿賜以玉帶所撰祖宗實錄成三卷進入

上焚香立受之賞賚有差詔與平章奕職俸外別給二品親王俸廉蓋異數也因宴五雲樓進酒稱謝帝起立俄同修國史進拜平章政事光懿皇后忌辰熙宗將出獵勅諫而止後又獵于海島三日之間凡遇五虎親射獲之勅獻東狩射虎賦上悅賜以佩刀玉帶良馬時上日與近臣酣飲或繼以夜因諫稍止進拜左丞相兼侍中八年奏上太祖實錄二十卷賜金銀重綵絹并通犀玉鈎帶出領行臺尙書省事召拜太保領三省事封魯國王爲人剛正寡言海陵方用事朝臣多附之者一日大臣會議海陵後至勗面責之曰吾年五十餘猶不敢後爾少年強乃敢如此海陵跪謝九年進拜太師封漢國王海陵篡立加恩大臣以收人望封秦漢國王及宗本無罪誅勗髡髮頓白因上表請老不許賜以玉帶優詒諭之有大事令宰臣就第商議入



朝不拜因稱疾篤表請愈切以本官致仕進封周宋國王正隆初與宗室俱遷中都二年例封金源郡王薨年五十九擬定女直郡望姓氏譜及他文甚衆其諫表甚有典則能以契丹字爲詩文凡游宴有可言者輒作詩以見意詔鏤板行之 子宗秀字實甫本名厮里忽涉獵經史通契丹大小字善騎射亦因平亂除定遠大將軍授以宗磐世襲猛安從宗弼復取河南與海陵俱赴軍前任使率步騎三千扼宋將岳飛衝要破其軍于亳宿之間師還爲太原尹改變速路統軍使高麗遣使以土產獻却之入爲刑部尚書改御中丞授翰林學士天德初轉承旨封宿國公賜玉帶歷平陽尹昭義軍節度使封廣平郡王正隆二年卒官年四十二例贈金 系光祿大夫

穆宗曾孫掃合名齊父胡八 官寧州刺史齊大定中克屬司將

軍授復州軍事同知在職廉能初復州合厮罕關地方七百餘里因圍獵禁民樵捕齊言其地肥衍令賦民開種則公私有益上然之爲弛禁卽牧民用是收利甚溥因建其地名合厮罕猛安自本朝以來宗室未有爲刑部員外郎者特以授之章宗立改戶部出爲磁州刺史治以寬簡未嘗留獄屬邑武安有道士視觀宇不謹吏民爲請隣郡王師者代主之道士忿奪其利告王私置銅器法當徒獄上齊審其誣時王師有德不忍反坐乃當以准首俱釋其罪磁名郡刺史皆經遴選郡人以前政有聲如劉徽柔程輝高德裕皆所不及河北提刑司以治狀聞明昌三年始議置諸王傅頗難其選乃以齊克王傅王將至任郡猛安迎接齊峻却之王怪問故答曰三國藩輔猛安皆總戎職於王何利焉却之以遠嫌也王悅服會家奴爲不法輒發還本猛

安終更無敢犯者明年授山東東西路副統軍兼同知益都府  
事有惠愛郡人爲之立碑轉彰化軍節度使六年移利涉軍召  
見勞慰擢上京留守承安二年致仕卒爲人明法令識治體所  
至有聲與丞相承暉並稱

康宗長子謀良虎名宗雄始生時世祖見其風骨非常他日必  
爲國器因解佩刀置其側俟成人則使佩之九歲能射逸兔十  
一射中奔鹿世祖坐之膝上賜以銀器曰異日必出倫輩旣長  
風表奇偉善談辯多智畧孝敬謙謹人愛敬之復以材武躡捷  
挽強射遠幾三百步嘗走馬射三疊已中其二馬蹶躍而下步  
射獲之又與撻懶逐兔撻懶已發矢反顧接之就射兔中其輕  
健如此康宗喪遼使阿息保來乘馬至靈帷階下擇取賜贈之  
馬太祖怒欲殺之因諫而止及將舉兵勸太祖遼主驕後可取

又不知兵一蕭海里不能擒而我擒之言合上意攻寧江州渤  
海兵銳甚宗雄以所部敗之論功授世襲謀克出河店之役摧  
鋒力戰居多達魯古城之戰命將右軍身先士卒遼兵已却復  
助左軍繞出其後擊之遼衆大潰乘勝逐北日已暮圍之黎明  
遼兵突圍出追殺至乙呂白石而還上撫其背賜以御服曰朕  
有此子何事不濟及遼主以七十萬衆至斡門諸將皆曰不宜  
速戰宗雄曰不然遼兵雖衆將皆庸懦士卒喘喘不足畏也破  
之掌握間耳上曰善乃率衆直前短兵接仍令前行持挺擊遼  
馬首後行者射之大敗遼兵上嘉其功執手勞之賜以御介冑  
及御戰馬寶貨奴婢斜也攻春州使與宗幹婁室取金山縣行  
近白鷹林獲候者七人縱其一歸縣人聞大軍至奔潰遂下金  
山復與斜也俱取秦州太祖自將取臨潢府遣爲先鋒遇遼兵

五千與戰大軍隨至大破之留守撻不野降賞以其女既而與蒲家奴按視泰州地土大宜種植包其土來奏上從之徙萬餘家往屯田西京既降復叛議者以糧盡欲罷攻宗雄曰西京都會若委而去之不惟降者離心遼之餘黨與夏人且將窺伺矣乃立重賞以激士心既而夜中有火大如斗墜于城中占曰此城破之象克日賜黃金百兩衣十襲及奴婢等又與宗翰等擊耿守忠兵七千于西京之東四十里大破之迎謁太祖于鴛鴦灤從至歸化州疾篤宗幹問所欲言對曰國家大業既成主上壽考萬年肅清四方死且無恨遂卒年四十六太祖來問疾不及見哭之慟謂羣臣曰此子謀畧過人臨陣勇決少見其比詔合扎千戶駙馬石家奴護喪歸葬於歸化州爲人好學嗜書嘗從上獵誤中流矢拔去神色不變恐上知罪及射者託疾歸家臥

兩月因學契丹大小字盡通之國初立法定制皆與宗幹建白行焉及與遼議和書詔契丹漢字復與宗翰希尹主其事大眷中追封太師齊國公天德二年加秦漢國王正隆例降太傅金源郡王大定二年追封楚王諡威敏配享太祖廟庭長子蒲魯虎襲猛安卒贈金紫光祿大夫孫桓端襲官至金吾衛上將軍卒子梟頻未襲而死孫蒲帶襲之大定末累官同簽大睦親府事北京臨潢提刑使朝辭于慶和殿上曰建立官制當寬猛得中凡軍民事相涉者均平決遣鈐束家人部曲勿使沮擾郡縣今以司獄隸提刑司惟冀獄犴無冤耳既退復遣近臣諭曰卿等皆妙簡才良付以專責盡心舉職別有旌賞否則有罰次子阿鄰穎悟辯敏通女直契丹大小字及漢字幼時嘗入宮熙宗見而奇之曰是兒他日必能宣力國家年十八授定遠

將軍順天軍節度使天德二年用廉遷益都尹兼山東東路兵馬都總管歷鎮秦寧定海鎮西安國四軍伐宋爲神勇武平等軍都總管由壽州渡淮與移刺元宜合兵三萬爲先鋒是歲十月至廬州敗宋將王權軍十餘萬于柘臯鎮渭子橋至和州南復與權軍八萬餘會戰又敗之追殺至江上斬首數千級軍還將渡淮舟楫甚少軍士爭渡不得預獲生口知可涉處識以柳枝命本部涉濟既至北岸遇宋人邀擊爭渡者多被殺獨得全軍而返遷兵部尚書監督經畫征窩斡諸軍糧餉授以金牌一銀牌四敗賊還至懿州以疾卒喪至京師上命致祭于永安寺百官赴弔賻銀絹重綵又次按答海一名阿魯綰性端重不輕發有父風年十五太祖賜以一品傘二十餘御毬場分明擊毬連勝三算宗工舊老咸異之賞賚獨厚天眷二年命襲父猛

安以讓兄子喚端除太宗正丞加武定軍節度使奉朝請改侍衛親軍都指揮使封金源郡王又進譚王同判太宗正事別授世襲猛安海陵將遷中都諫曰棄祖宗興王之地而他徙非義也海陵不悅留之上京徙河間以其土瘠隨便遷其族二十五家于平州久之進封鄆王改魏王除濟南尹地復卑濕改西京留守正隆例奪王爵除廣寧尹世宗卽位詔至其弟燕京勸拒弗受言甚指斥按答海曰此府迫近遼陽勢不能抗聊且受之從諸郡上謁東京有司議持兩端請併誅之上以按答海爲弟所惑若正隆剪刈宗室朕不可效特命釋之獨誅燕京不數日復判太宗正事再遷太子太保封蘭陵郡王改勸農使給官田三百頃屋三百間宗州官田百頃進金源郡王致仕大定八年召見上謂宗室耆老如卿者能幾賜錢萬貫甲第一區留京師

使預巡幸毬獵宴會十四年薨年六十七臨終戒諸子曰汝輩勿以生富貴中而為暴戾宜自謙退海陵以猜忌剪滅宗室我惟純謹得免當思效之勿墜吾家

康宗子隈可名猥喝美鬚髯勇健有才畧從太祖伐遼取寧江州戰出河店天眷二年授驃騎上將軍除迭魯苾撒兀詳穩遷累忠順興平軍節度使天德二年入為大宗正丞四年出為昭德軍節度使授上京路扎里瓜猛安所屬世襲謀克改德昌軍節度使封廣平郡王正隆例改曷速館節度使再轉忠順軍大定元年封宗國公為勸農使卒官年六十五初宗幹納宗雄妻海陵銜之及篡位使宿直將軍晁霞牌印間山往河間囚之與其子婦及孫常春胡里刺胡刺鶻魯等并茶札之子七人皆殺而焚之棄其骨於濠水大定十七年詔有司收葬

弘簡錄卷二百二十四

明刑部員外郎仁和弘齊邵經邦學

皇清翰林院侍講學士四世孫遠平校閱

載記 金內族四 太祖諸子

宗峻 子常勝 宗輔 宗幹 子克克襄袞袞孫擅奴兀奴 宗望 子齊京文

宗弼 子亨 宗傑 宗強 子阿鄰可喜 宗敏 宗雋

太祖嫡子宗峻本諱繩果天輔五年命領合札猛安 合札猛安者太子之

也 猛安 受金牌從都統杲取中京遂與俱襲遼主于鴛鴦濼西京

復叛耿守忠引兵五千來救至城東四十里 也 察烏烈谷赦先

擊之宗峻與宗翰等繼至敵先據城南浮圖下射士卒多傷宗

峻曰先取是則西京可下攻果克之亟率麾下衝其陣餘兵

皆下馬從旁交射守忠敗走盡殲其眾遂下西京太祖崩與兄

宗幹率宗室羣臣立太宗天會二年七月壬午薨後因子合刺以長孫嗣立是爲熙宗追上尊諡曰景宣皇帝廟號徽宗改葬興陵海陵弒立降爲豐王世宗復尊之 次子常勝名元爲北京留守封胙王弟查刺安武軍節度使皇統七年賜燕便殿熙宗酌酒賜元辭不能飲上怒仗劍逼之元逃去命左丞宗憲召元亦與俱去上益怒時戶部尚書宗禮在側使之跪手殺之適河南軍士孫進自稱皇弟按察大王熙宗疑是常勝使特思鞠之無狀時海陵將謀廢立忌胙王有人望不除之將不得立唐括辯復惡特思欲併除之謂熙宗曰孫進反有端不稱他人乃稱皇弟大王特思鞠不以實故出之熙宗以爲然使辯與蕭肄覆按特思自誣服乃殺常勝查刺并特思海陵乘此遂擠阿楞及弟撻楞皆殺之非上本意篡立後追封常勝查刺阿楞官爵

親臨墓所致祭爲人天性賢哲外若愚訥臨事明敏過人與世宗兄弟間尤款密 子育本名合住大定二十七年自南京副留守遷大宗正丞兼勸農副使爲人清廉幹治不忝乃父

次子宗輔初諱訛里朶大定上尊諡追改宗堯生而魁偉尊嚴望者畏懼性復寬恕好施惠尚誠實常居帷幄與諸子皆總戎旅天輔六年太祖親征太宗居守黃龍府安福哥誘新降之民以叛宗輔與烏古迺討平之南路軍帥暢實答以賊敗詔往闕實咸稱平允天會五年代宗望爲右副元帥駐兵燕京分遣諸將徇地淄青發自河間至樂安破宋馬括兵二十萬明年二月移刺古破宋臺宗雋宋忠軍五萬于大名獲之冀州人乘夜出兵襲照里營擊敗之宋主奉表請和密以書誘契丹漢人詔伐宋令發河北攻克大名取東平及徐州降劉豫於濟南襲宋主

于揚州語在宗翰傳中時婁室經畧陝西所下城邑叛服不常其監戰阿盧補請益兵帥府會諸將議曰陝西五路兵力雄勁非不足用而綏懷之道有所未盡誠得位望隆重恩威兼濟如皇子者以往可指日而定詔乃使宗輔以右副元帥總陝西征伐諭令戮力自愛時宋張浚兵取陝西宗輔至洛水治兵與浚戰于富平自日中至于昏暮凡六合戰破之耀州鳳翔府皆來降遂下涇渭二州敗宋經畧使劉侃軍于瓦亭涇原路統制張中孚知鎮戎軍李彥琦咸以城降招討都監馬五擊走宋秦鳳路都統制吳玠軍于隴州宗輔進兵降甘泉等三堡取保川城破宋熙河路副總管軍三萬獲馬千餘板安西等二寨分遣都統阿盧補宗弼招撫城邑之未下者凡得鞏洮河樂西寧蘭廓積石等州定遠和政甘塔寧洮安隴等城寨及鎮堡蕃漢營部

四十餘所并涇原熙河皆平遂班師與宗翰俱朝京師爰立熙宗爲諱班勃極烈宗輔爲左副元帥十三年五月甲申行次媯州薨年四十陪葬睿陵追封潞王諡襄穆皇統六年進冀國王正隆二年追贈太師上柱國改封許王世宗卽位追上尊諡立德顯仁啓聖廣運文武簡肅皇帝廟號睿宗二年改葬于大房山號景陵

庶長子宗幹本名幹本伐遼至其界使率衆先往填塹士卒屺度遇渤海軍馳突而前左翼七謀克少却遂犯中軍太祖戒杲遇大敵不可易使宗幹馳出控止導騎誓堙之馬杲乃還從戰達魯古城以中軍爲疑兵及攻下黃龍府太祖卽欲取秦州宗幹勸以休息士卒遂班師旣而得降人言秦州無備可取復令糾也取之又下金山縣宗雄屬以兵三千招集未降諸部宗幹

擇士人材幹者以詔書諭之遂降女固脾室四部及渤海人太祖以暑月克臨潢府深入敵境至沃黑河諫以士罷馬乏糧餽不繼恐有後艱復從之宗翰嘗再使諭都統杲移賚勃極烈灼見事機彼已發兵不可中止請從其策當時無宗幹言杲終無進兵意既會軍于羊城濼使宗幹以精兵六千襲遼至五院司復敗耿守忠兵語在前傳太宗卽位拜爲國論勃極烈與斜也同輔政天會三年旣獲遼主啓太宗始議禮制度正官名定服色興庠序設選舉治曆明時熙宗卽位以有保傅之力拜太傅領三省事天眷二年進太師封梁宋國王監修國史入朝不拜賜以杖令策上殿復有足疾詔設坐奏事詔議南伐率羣臣奏末蒙再造之恩不思報德妄自鳴張所求無厭今若不取後恐難圖上曰彼將謂我不能奄有河南之地遂詔中外復河南疆

土皇統元年賜車輿上殿制詔不名從上幸燕京有疾駕親臨問自燕京還至野狐嶺因疾亟不行復臨問語及軍國事上悲泣不已明日再同后往視后親饋食至暮而還爲赦罪囚以禳五月己酉薨輟朝七日其制始此日官奏戊亥不宜哭上曰君臣之義骨肉之親豈可避之因哭之慟生日亦不舉樂喪至上京幸其第視殯事葬日仍臨視之次子海陵篡立追諡憲古弘道文昭武烈章孝睿明皇帝廟號德宗以故第爲興聖宮大定二年除去廟號改諡明肅皇帝及海陵廢追削明肅帝號封爲皇伯太師遼王諡忠烈妻子諸孫皆從降例明昌四年配享太祖廟庭餘子克克襄袞充本名神土憲熙宗初加光祿大夫天眷間留守汴京皇統中封淄國公爲吏部尚書進封代王遷同判大宗正事九年正月戊戌拜右丞相壬寅轉左丞相薨追



引簡錄 卷三十四  
封鄭王大定二十二年降儀同三司左丞相長子檀奴爲歸德軍節度使幼子阿里白定遠大將軍和魯忽土猛安忽隣河謀克俱爲海陵所殺世宗贈檀奴榮祿大夫阿里白輔國上將軍詔有司改葬 仲子元奴名永元字惇禮幼聰敏口誦千言善左氏春秋通其大義皇統元年試宗室子作詩中格天德初授百女山世襲謀克與弟耶補兒逃歸遼陽世宗卽位授永元世襲猛安爲宗正丞改符寶郎灤州刺史耶補兒襲其謀克轉棧州防禦使時張弘信通檢山東督責苛急專以多得民間物力爲功永元面責之曰朝廷立法本以差調不均今反妄加殘酷筆擊農民有至死者達官子孫使與商賈同處上役豈立法本意哉弘信無以對自是棧州賦稅得以實自占累遷秦寧震武軍節度使大定六年母憂起復改崇義軍又徙順義軍歷典大

藩多知民間利害所至稱治朔州西境多盜而滑吏大姓又羣獄訟亂賦役至乃剔其宿姦百姓安之政迹尤著其民並爲立祠會與濟州防禦使幹論坐孳畜小過俱解職頃之起爲保大軍節度使歷昭義絳陽震武三軍遷濟南尹北京副留守改與中尹終彰德軍節度使年五十一遣使致祭賻銀絹雜綵 充本名梧桐皇統七年由左副點檢轉都點檢九年爲會寧牧改左宣徽使使宋還值海陵篡立拜司徒兼都元帥領三省事進太尉盡賜以太祖妃蕭氏財產羅都元帥府立樞密院卽命爲使天德四年十二月晦薨元旦輟朝不受賀進封克王大定例降特進子阿合大定中爲符寶祗候至定武軍節度司知 襄本名永慶海陵母弟爲輔國上將軍卒天德二年追封衛王再贈司徒大定例降銀青光祿大夫子和尚封應國公賜名樂善

大定間家奴小僧月一妄言和尚寢有異徵襄妃僧酷以爲信然召日者李端卜之云當爲天子司天張友直亦云當大貴別奴李添壽上變下僧酷和尚于獄驗問有狀皆伏誅世宗傷閔者久之 袞本名蒲甲桀驁強悍初爲輔國上將軍天德初加特進封王爲吏部尚書判大宗正事坐語禁中起居狀與承旨宗秀護衛麻吉小底王之章皆決杖有差未幾授猛安及遷中都道中以爲西京留守與西京兵馬完顏謨盧瓦往來有舊嘗遺以玉帶稱其驍勇不減尉遲敬德編修官圓福奴之妻與蒲甲姻戚嘗戒大王名太彰著宜少謙晦家奴喝里知海陵疑之乃上變言與謨盧瓦等謀反嘗召日者詢問命御史大夫高禎刑部侍郎耶律慎須呂就西京鞠之無狀海陵怒使人往械至中都不復究問斬之丁市餘皆處死

第二子宗望本名幹離不每從征伐常在左右與都統杲出青嶺遇遼兵三百餘掠降人家貲悉生致之審得遼主所在虛實獨與馬和尚馳擊大敗而走生擒五人主尚在鴛鴦濼未去進兵追之主走陰山弟普王捏里自立新定雲中諸州人心不固奉杲命與十餘騎跋涉兵寇經數千里請上臨軍諭以懸軍遠伐豈能盡合機宜朕卽啓行旣次大灤西南杲使希尹奉請徙西南招討司諸部人于內地土問當出何路宗望對曰中京殘敝芻糧不給由上京臨潢府爲宜然新降之人遽爾騷動未降者必皆疑懼勞師害人所失多矣上廼下其議命軍帥度宜行之上聞遼主在大魚濼自將精兵萬人襲之晝夜兼行及石輦鉅馬多困乏軍士至者纔千人遼軍尚二萬五千方治營壘先鋒昱與余睹議我軍未集人馬疲劇未可以戰宗望爭曰今追

及遼主而不亟戰日入而遼則無及矣兩軍遂戰短兵接遼人圍者數重士皆殊死鬪主度吾兵少與嬪御方自高阜下臨平地觀看余睹指示諸將此遼主麾蓋若萃而薄之可以得志騎兵馳赴之主果望見大驚遼去之間遼兵大潰宗望等還燕京已定命佐幹魯爲副都統襲主陰山將至青塚衆遇泥濘不能進獨與當海四騎以繩繫遼都統林牙大石使爲鄉導直至其營主時已往應州諸嬪御驚駭爭欲出奔命騎下執之有頃後軍至降遼太叔胡盧瓦妃捏里次妃遼漢夫人并其子秦許二王女骨欲餘里衍幹里衍大與野次與野趙王妃幹里衍招討廸六詳穩六斤節度使孛迭赤狗兒得車萬餘乘惟寧王雅里及其長女乘軍亂亡去進至掃里門爲書以招遼主方自金城來知其族屬皆見孛迭赤率兵五千餘決戰宗望所引千兵擊敗

之相去僅百步復遼去獲其子趙王習泥烈及傳國璽上于行在太祖喜錄諸帥功加以厚賞獻俘賜以遼蜀國公主餘里衍遼主使謀虜死持兔鉏金印請降宗望受之視其文乃元帥燕國王之印復遣書招諭以石晉北遷事又遣使諭夏國曲示和好以沮其救遼之心進兵趨天德獲遼耶律慎思候人吳十回言夏國迎護遼主渡河傳檄諭之果欲附我當執送遼主若猶疑貳恐有後悔無何使問闕與敗狀就以其軍討覺降瀕海郡縣與戰南京城東覺敗奔入于宋城中人執其父及二子來獻宗望殺之賞有功將士各有差移書責宋納叛且徵軍糧請空名宣頭增信牌安撫新降之民詔以新附長史職員仍舊命諸路轉輸軍糧勿督於宋給以銀牌其遷濶來隰四州人徙于瀋州者俟畢農各復其業方遣使以詔書宣諭張敦固等出降使

者與俱入城收兵城中人復殺之立敦固爲都統劫府庫掠居民棄城拒守引兵八千分四隊出戰又大敗敦固等以屢嘗拒戰不敢遽降再三開諭許其望闕遙拜乃開一門遣闍母入奏下詔赦南京官民罪無大小皆釋之官職如舊別勅有司輕徭賦勸稼穡聞比歲不登若如舊徵歛恐民匱乏乃度其糧數賦之射糧軍願爲民者使復田里時遷潤來隰之民尚保山砦亦從其請特選良吏招撫俄召赴闕宋兵三千自海道來破九寨殺馬城縣戍將節度使度盧幹取其銀牌兵仗及馬而去又聞童貫郭藥師治軍燕山乃首建伐宋之策奏曰若不伐宋必爲後患上意決以監闍母劉彥宗兩軍自燕山路進至三河破藥師兵四萬五千遂取燕山府盡收其軍實馬萬匹甲冑五萬兵七萬州縣悉平宋中山戍將王彥劉璧率部下二千來降次耶

鄆宋李鄴請修舊好留之軍中不遣自藥師降益知宋之虛實請以爲燕京留守及董才降益知宋之地里請任以軍事太宗俱從之賜以國姓咸給金牌四年諸軍由滑州渡河圍汴宋沈晦以誓書三鎮地圖至軍中歲幣割地一依定約遂與宋平退軍孟陽候騎覺姚平仲兵來襲分遣諸將迎擊大破之復進攻城問舉兵之狀少帝大恐使宇文虛中辨說初不知其事且將加罪其人乃輟弗攻師還河北兩鎮不下分兵進討罷常勝軍給還燕人田業命將士分屯安肅雄霸廣信之境已還山西拜右副元帥有功將士遷賞有差八月詔復伐宋會諸將發自保州耶律鐸破宋兵三萬于雄州殺萬餘人那野等敗宋軍七千於中山高六董才又破宋兵三千於廣信降其軍及旁近縣鎮宋种師閔軍四萬駐井陘宗望大破之遂取天威軍東還克真

定殺知府李邈得戶三萬降其五縣自真定趨汴十一月戊辰宗望至河上降魏縣諸軍渡河留諸將分出大名之境臨河大名諸縣并德清軍開德府皆克之阿里剗以騎兵三千取胙城先趨汴破宋軍六千于路抵城覆宋兵千人擒其數將因分遣諸將遏宋援兵閏月壬辰朔宋兵一萬自汴州出戰選勁勇五千使當海忽魯離鶻失擊敗之自克汴與勞賜並與宗翰傳同大軍北還分諸將鎮守河北宗望乃西上涼陘是月薨天會十二年封魏王皇統三年進許晉國王天德二年加贈太師遼燕國王配享太宗廟廷正隆例降大定三年改封宋王諡桓肅子齊京文 齊本名受速長身美髯天眷三年授鎮國上將軍皇統初遷光祿大夫正隆六年加銀青榮祿大夫大定初授特進安武軍節度使本以近屬上所寵遇而性庸滯無才能三年罷

節度官給隨朝三品俸卒子敵住土命英王爽於諸公主女中爲擇其婚禮幣官給 京本名忽魯累遷特進天德二年除翰林學士承旨兼修國史加開府儀同三司歷工禮兵三部尚書判大宗正事封曹王除河間尹正隆例降瀋國公北京留守居喪起復益都尹六年坐違制飲酒降灤州刺史未幾改絳陽軍節度使海陵遣護衛忽魯往殺之由間道走入汾州境得免世宗卽位來見于桃花塢復判大宗正事封壽王加禮兄弟情若同生大定二年正月日食上不視朝詔京代拜行禮語以朕每見天象變異輒思政事之闕寤寐自責不遑凡事必審思而後行猶懼獨見未能盡善每令羣臣集議庶幾無過舉也時未罷伐宋兵用度不足百官罕給全俸聞京家口數百賜以白金重綵絹匹改西京留守加賜佩刀廄馬其妻公壽嘗召日者孫邦

榮推京祿命言官至太師爵封王京曰此上更無加乎邦榮察其意乃詐爲圖讖稱所得卦有獨權之兆京復使推世宗當生年月家人孫小哥妄作謠言誑惑如邦榮指京信之大定五年三月邦榮上變詔刑部侍郎高德基戶部員外完顏兀古出往鞫皆欵伏獄成還奏上特免其死決杖除名嵐州樓煩縣安置給第一區月支節度廩俸隨以奴婢百口仍給上田遣兀古出劉琬宣詔曰朕與汝皆太祖之孫尤爲親愛汝亦自知之何爲而懷此心朕念骨肉不忍盡法汝若尚不思過朕雖不加誅天地豈能容汝也十二年兄文復謀反皇太子併趙王允中及幸臣皆言惟不除京今致此患上曰天下大器歸於有德海陵失道朕乃得之但務修德餘何足慮遣使宣諭卿兄弟舊封國公不任職事朕進封王爵委以八藩不知恩幸乃蓄怨心謀爲不

軌其罪兄弟妻子皆當緣坐朕念宋王有大功于國故置不問文之家產應沒入者盡與卿兄子齡住仍襲京山東西路徒母堅猛安卿宜悉此意二十年十一月上復問宰臣京之罪始於妻卜休咎太祖諸孫存者無幾朕欲召置左右不使任職但廩給之何如皆應曰非宜上口朕若修德何必豫懷疑忌遂止

文本名胡刺皇統間授世襲謀克加奉國上將軍居中京頗自放驕縱無度與運使左淵嘗從穢術敲仙者游于市中海陵召敲仙詰問窮竟本末殺之咸被責讓貞元初除秘書監犯姦決杖除名俄復之封以王爵正隆例降鄖國公以喪去大定初起復翰林學士承旨同判大宗正事歷昌武武定二軍節度使留京師奉朝請三年賜上常御條服佩刀而遣之語以朕無兄弟見卿往外郡惻然傷懷卿宜加檢束自今懲咎悔過赤心事朕

引簡錄 卷一百二十四  
無患朕不知也俄除廣寧尹召判太宗正事改封英王復除眞定尹賜以衣帶改大名尹徙封荆王坐多取猛安謀克良馬買民物不償直占役弓手詭納稅草諸違法事露奪爵降德州防禦使僚佐皆坐不矯正解職因是怏怏日與奴石抹合住忽里者爲怨言合住揣知其意詭言南京路猛安阿古合住謀克頗里銀术可與大王厚善果欲舉大事彼皆願從文信其言使奴剛哥等往遺書幣召日者康洪密占休咎洪言來歲甚吉方造兵仗畫陣圖隸僕重喜詣河北東路上變遣總管判官李特防禦判官酬越往捕是夜文知覺亡去事聞二官決杖除名廷遣右司郎中紇石烈哲典翰林修撰阿不罕訛里也督所在捕獲者遷官賜錢至十二月被獲伏誅餘皆論死特釋其妻术實懶時北京曹貴鄭州李方坐是亦陷大戮因詔自今宗室及官職

除占問嫁娶修造葬事不得推算相命違坐徒從重

第四子宗弼本名斡斃金語作兀术同兄宗望在軍嘗率百騎馳擊越盧亭古野里斯等敗之矢盡奪遼兵士槍獨殺八人仍同襲取遼主于鴛鴦濼從伐宋取湯陰縣降其卒三千至御河橋已焚不得渡合魯索以七十騎涉水而過殺宋焚橋軍至宗弼引三千騎竟薄汴城宋上皇出奔選百騎追之弗及獲馬三千匹而還復從宗輔徇地淄青敗宋鄭宗孟數萬衆遂克青州復破賊將趙成并黃瓊軍取臨朐軍還遇敵三萬于河上擊敗之殺萬餘人追宋康王初攻開德府糧乏轉攻濮州前鋒烏林答泰欲破王善二十萬衆克其城降旁近五縣復攻開德先登奮擊破之攻大名軍復先登河北平宋主自揚州奔江南分道伐之進攻歸德城中兵自西北二門出爲當海所敗方絕隍

築道列礮治具因懼遂降又攻下睢陽至壽春宋安撫使馬世元率官屬出迎進下廬州再降巢縣時鄺瓊萬餘衆守和州當海等復破之遂渡江將至江寧西二十里宋杜充率步騎六萬來拒戰鶻盧補當海廸虎大臭合擊破之宋陳邦光以江寧府降留長安奴幹里也守江寧使阿魯補幹里也別將兵徇地下太平濠州句容溧陽等縣沂江而西屢敗張永等兵充遂降宗彌取廣德軍路追襲宋主取湖州遂至餘杭官守巨室皆逃去攻克杭州留城中宋主走入于海分麾下兵會攻明州克之而自引兵取秀與平江韓世忠以舟師扼江口我軍舟小并丹漢軍沒者二百餘人遂自鎮江沂流西上世忠來襲奪其大舟十艘循南岸且戰且行世忠循北岸艤龐大艦連絡數倍宗彌軍前後擊柝自夜達旦世忠挑戰不絕一日數接將至黃天蕩因

老鸛河故道一日夜開三十里通秦淮宗彌乃得至江寧捷懶使移刺古自大長來援恭欲亦以兵來會連敗宋兵將渡江而北宗彌軍渡自東移刺古渡自西與宋兵戰江口世忠分舟師絕江上下舟皆張五綳因選善射者乘輕舟射以火箭五綳皆自焚壘燄滿江世忠不能軍追北七十里僅能自免舟軍殲焉還從宗輔定陝西與張浚遇于富平宗彌陷重圍中韓常流矢中目怒而拔去其血淋漓塞之以上宗彌躍馬奮呼俱出搏戰遂敗浚軍又與阿盧補招降熙河涇原兩路及攻吳玠于和尚原抵險不可進方退軍遇伏且戰且走行三十里將至平地宋軍陣于山口宗彌大敗將士多沒明年復攻和尚原克之天會十五年爲右副元帥封瀋王天眷二年自軍中入朝拜都元帥進封越國王察知捷懶與宋人交通賂遺詔往燕京誅之卽領



行臺尚書省事治民訟錢穀兼總帥府決諸州郡軍旅之事既久任方面深究利害請即舉兵復河南疆土詔山黎陽趨汴遣孔彥舟下汴鄭兩州王伯龍取陳州李成取洛陽自率衆取亳州及順昌府嵩汝等州相次皆下因天暑還軍于汴三年河南平上遣使勞問加太保有功將士三千並授忠承校尉又攻克嵐石保德九月壬寅來朝見上于燕京起立酌酒飲之賜以甲冑弓矢良馬二匹庚申還軍皇統元年進伐淮南克廬州復朝燕京詔與宰相同入奏事拜左丞相兼侍中監脩國史詔以燕京路隸尚書省西京及山後諸郡族隸元帥府七月巳酉還軍渡淮以書責讓宋人答書乞加寬宥令遣信臣來稟議宋主乞先歛兵許敝邑拜表闕下上遣護衛將軍撒改往勞之宋遣曹勛來上誓書畫淮爲界仍進歲幣進拜宗弼太傅表乞致仕優

詔不許賜以金券皇統三年爲太師領三省事自宗翰死宗弼宗雋撻懶湛溺富貴人人有自爲之心宗幹獨立無如之何時無宗弼國勢危殆屢矣八年十月辛酉薨世宗嘗言宗翰之後惟宗弼一人非虛言也大定十五年謚忠烈十八年配享太宗廟庭子孛迭名亨熙宗時封芮王爲猛安加銀青光祿大夫海陵篡立加特進素號材武勇力絕人以為右衛將軍將謁太廟密諭之曰朕疑太宗諸子太強得卿衛左右可無慮耳賜以良弓辭曰弱不可用海陵遂忌之出爲真定尹歷中興東京留守家奴梁遵誣告與衛士符公弼謀反考驗無狀坐誅海陵益疑之改除廣寧尹使李老僧伺察動靜亨至廣寧待老僧甚厚常因蒲博多遺財物不忍致亨死罪遲疑者久之海陵再使小底訛論促老僧會渤海大族六斤坐累爲奴頗慧黠因與侍妾

私通懼亨聞知密誣欲因間刺海陵老僧捕繫以聞遣工部尚書耶律安禮大理正忒里等鞠之復無驗海陵怒竟遣老僧夜至囚所殺之正隆六年復殺妃徒單氏次妃大氏及子羊蹄等三人大定中追復官爵封韓王并妻子詔有司改葬宗傑本名沒里野天會五年薨十三年諡孝悼天眷元年追封越王以其長子奭爲會寧收封節王後歷上燕西三京留守皇統三年薨海陵將謀弑立構其子阿楞撻楞并宗傑妻皆殺之大定間贈宗傑太師進封趙王

宗強本名阿魯天眷元年定封國制初封紀王三年代宗因爲燕京留守改封衛王至太師皇統二年十月甲午薨輟朝七日喪至上京上親臨哭之慟仍親視喪事了阿鄰名爽天德三年受世襲猛安正隆二年除橫海軍節度使改安武軍留守奉朝

請海陵將伐宋嚴酒禁爽坐與徒單貞會飲下遷歸化州刺史奪猛安未幾復其官海陵渡淮分遣使者剪滅宗室爽憂懼不知所出會世宗卽位爽弟阿瑣遣人來報卽棄妻子奔迎至梁魚務入見世宗大悅除殿前馬步軍都指揮使封溫王改秘書監母憂起復遷太子太保進封壽王賜宴神龍殿語以朕賴卿兄弟之福安享快樂在正隆時朝夕常懼不保爽泣下頓首未幾判大宗正事有疾特遷其子符寶祇候思列爲忠順軍節度副使時年尚少未聞政事入謝諭以朕意冀卿因喜而愈自今訓以義方使有善可稱別加陞擢疾少間將從上如涼陞賜錢千萬進封英王累太子太傅并太師復世襲猛安加封榮王二十三年薨上悼痛輟朝遣官致祭賻銀絹重綵陪塋山陵親王百官送葬弟可喜累官唐括部族節度使降忻州刺史畏避

海陵棄州來歸迎見世宗于麻吉鋪除兵部尚書素負才勇過人自以太祖孫頗有異志世宗初至中都倥傯多事扈從諸軍未暇行賞咸出怨言有幹論者正隆末爲昭武大將軍監完顏殺英軍于歸化道遇獨吉和尚持大定赦文至彰德使人招之幹論不聽率兵來拒和尚亦列所將蒲葦兵列陣待之會幹論兵皆不肯戰遂請降和尚邀入相州收其甲兵置酒相勞幹論托腹疾不肯飲至夜與其腹心密謀欲執和尚爲所覺不得發與河南統軍司令史幹里朶俱謁世宗亦撫慰之幹論白懷初無降志幹里朶爲人狡險咸不自安欲因扈從軍士怨望作亂往約押軍猛安沃窟刺從之大定二年上謁山陵可喜中道稱疾而歸乙亥夜召李惟忠完顏璋并布輝同會其家沃窟刺以兵赴之璋曰今不得高公軍事不成遂與可喜布輝共擒幹論

惟忠幹里朶沃窟刺詣官自首下獄皆伏誅可喜不肯自言其始謀及與幹論面質然後欵伏上念兄弟少太祖孫惟數人在惻然傷之詔罪止可喜一身其兄弟子孫皆不緣坐 阿瑱長身多力天德二年累授奉國金吾衛上將軍居於中都世宗卽位與璋殺留守沙離只自行留守事語見璋傳大定二年授橫海軍節度使賜以名鷹時方年少詔以卿有才力宜自砥厲留心政事改武定軍母憂起復轉興平軍賜以襲衣廐馬遷廣寧尹坐贓犯法當死以親親故曲爲全貸杖削解職頃之起爲平涼并濟南尹入見常武殿上申諭戒以自今戒懼勿復使惡聲達于朕聽未幾卒于官年二十七命有司致祭賻銀絹重綵宗敏本名阿魯補天眷元年封邢王皇統三年爲東京留守拜左副元帥兼會寧牧進都元帥兼判大宗正事加太保領三省

事尋領行臺尚書省事封曹國王屢憂熙宗性喜殘殺乘左右  
無人密語海陵國家事重奈何輒殺大臣海陵將以為指斥自  
念無證不可發及弑熙宗畏其屬尊且材勇欲構誣以除之時  
世宗為葛王使召之宗敏疑懼不敢往王曰叔父今不即往至  
明日如何相見不得已入宮海陵尚猶豫以問烏帶答曰彼大  
祖子不殺之必有異議乃使僕散忽土刃擊宗敏左右走避膚  
髮狼藉血肉遍地葛王見之問於眾曰國王何罪而死烏帶曰  
天許大事尚已行之此蟻蝨爾何足道者天德三年追封太師  
進封爵妃蒲察氏進國號封子撒合斡舒國公賜名褒進封王  
阿里罕封密國公正隆六年見殺大定間詔復官爵  
宗雋本名訛魯觀為東京留守時劉豫已廢撻懶自河南入朝  
倡議以廢齊故地界宋熙宗命羣臣議皆曰不可獨宗雋與相

合謂我委地與宋必然德我宗幹等爭之不能得宗憲復折之  
曰我俘宋父兄弟怨匪一日若復資以土地是助讐以戕我  
何德之有不聽撻懶弟昂亦曰不可既退責以他人尚有從者  
汝乃異議乎昂曰苟利國家豈敢私耶天眷元年拜宗雋左丞  
相開府儀同三司兼侍中封陳王二年加太保進封充國王領  
三省事時宗磐位首相竟以河南陝西地與宋後坐交結朋黨  
伏誅

冊曰金國蹶興實資內族五人夾輔徽宗三相秉軸宗幹  
彌宗徽睿德顯四君誕育而今而後最駕出矣

弘簡錄卷二百二十五

明刑部員外郎仁和弘齋邵經邦學

皇清翰林院侍講學士四世孫遠平校閱

載記金內族五太宗以下子孫

宗磐宗固宗美光英附訛里也元壽補廣陽允恭子琮瓌

永中永昭永功子璠永德 永成

永升按辰從恪 守忠 守純訛可

太宗子宗磐本名蒲魯寔天輔五年從斜也取中京以為副使

天會十年為國論忽魯勃極烈熙宗即位優禮宗室拜尚書令

封宋國王未幾進太師與宗翰並領三省事沒後日益跋扈嘗

與宗幹爭論熙宗但為兩解驕恣不改輒於上前持刀向宗幹

都點檢蕭仲恭呵止之後伏誅宗固名胡魯天眷元年與胡

魯補等十三人皆封爲王久之同判太宗正事皇統六年爲太保右丞相兼中書令明年薨宗本名阿魯皇統初拜司空九年三月辛丑爲右丞相兼中書令九月庚戌進太保領三省事海陵心忌太宗諸子嘗與熙宗私議宗本等勢強主上不宜優寵太甚及篡立進爲太傅猜忌益深與蕭裕謀使蕭玉告宗本親與玉言汝於我故舊可布腹心秉德臨行時言彼領行臺在外論說軍民內倚太傅爲應何事不成又內侍張彥善相相太傅有天子分其長子領里虎當大貴主上見之輒不喜故心常恐懼不令入見若太傅一尸得大位此心方安因與玉馬一匹袍一領克表識物時玉出入其家親信如家人海陵因詔天下庶民可示信陽使人召與擊鞠陰命左衛將軍徒單特思并裕妹婿近侍局副使耶律闌離刺密伺宗本及判太宗正事宗美至

卽殺之宗美名胡里甲臨死神色不變復遣使殺東京留守宗懿北京留守卞益都尹畢王宗哲平陽尹稟左宣徽使京等凡七十餘人家屬分置別所使人要之於路并子男無少長皆殺之而中京留守宗雅喜佞佛海陵知其無能將存之以奉太宗後名至闕不數日竟殺之太宗後遂絕卞本名可喜稟名胡里改京宗固子名胡什賚大定二年追封宗固魯王宗雅曹王宗順隋王宗懿鄭王宗美衛王宗哲韓王宗本潞王神土門幽王斛孛束潘王幹烈鄂王胡里改胡什賚可喜並贈金吾衛上將軍惟宗磐宗雋阿魯補斛沙虎鶻懶不復加封

海陵子阿魯補襁褓時養于宗正方家賜以錢千萬移永寧宮及徒單斜也家又以燕京轉運使趙襲慶多男冒名曰趙六後賜名光英改鷹坊爲馴鷲坊英國爲壽國應國爲杞國宋光州

爲蔣州光山縣爲朗恩縣光化軍爲通化軍以避其諱天德四年立爲皇太子因安置太祖畫像于武德殿盡召國初破寧江州有功者得百七十六人並加宣武將軍賜以酒加帛有忽里罕者年百歲有子十人解其衣以進願太子壽考多男與小臣等海陵使光英受其衣卽答賜以所服并佩刀太醫院保全部李中保和大夫薛遵義俱以醫藥入侍超換宣武將軍太子左右衛副率貞元元年詔京朝官五品以下奉引自通天門入居于東宮正隆元年三月二十七日慶誕宴百官于神龍殿賜京師大酺一日恐其羸懦令習騎射四年八月射鴉獲之海陵大喜命薦原廟賜馬一匹黃金三斤班賜從者有差六年行幸南京次安肅州射獲二兔居數日復獲二聲俱薦于山陵從官皆稱賀賜名馬弓矢六月至南京與其載入汴羣臣迎謁嘗言俟

太子年十八付以天下朕當日遊宴於宮掖苑囿中以自娛樂又見其天資警悟宜擇碩德宿學之士以輔導之使知古今防過失一日因誦孝經忽語人曰經言三千之罪莫大於不孝上何而言其人對曰今民家子博奕飲酒不養父母皆不孝也光英默然良久曰此豈足爲不孝耶其意蓋指海陵弑母之事及伐宋留之居守臨別挽衣號慟左右皆泣以飽滿訛里也爲太子少師兼河南路統軍使以衛護之遇弑之日督府移文殺之時年十二世宗聞之不忍言使光英若在朕必保全之葬於大房山諸王墓次訛里也咸平路窟吐忽河人襲其父忽土猛安除邳州刺史三遷昌武軍節度使歸德尹南京留守大定二年爲元帥右都監宋人陷陳蔡師久無功解其職俄起爲京兆尹門多私謁百姓惡之三年卒

元壽母大氏元妃之妹名蒲速婉乃判太宗正阿里虎妻因入見逼迫淫之天德元年元壽生封崇王三年薨 劄思阿補母唐括氏名石哥定哥之妹乃宗望子文之妻海陵私之語文庶母按都瓜必出而婦不然我將別有所行按都瓜以語文初意難之勸以不從必殺汝豈以一妻而自禍其身耶文不得已相與抱持慟哭而訣時已遷都至中京納之因名文至便殿使保於其前穢談戲笑大以爲樂定哥死遣令出宮不數日復召入封爲修容進昭儀正隆元年四月阿補生小底東勝家賜錢十萬令保養之仍爲起第五月巳酉彌月封母爲柔妃賜京師貧者五千人錢二百二年生日海陵與永壽太后及皇后太子幸東勝家亦三歲薨追封宿王葬大房山殺太醫副使謝友正醫者安宗義及其乳母杖東勝一百除名 廣陽母南氏本大吳

家婢隨元妃入宮海陵幸之卽有娠命爲殿直正隆二年九月生十月滿月分施在京貧民用錢千貫三年二月封南氏爲才人七月封廣陽爲滕王九月薨

世宗嫡子允恭本諱胡士瓦母烏林答氏以皇統六年丙寅歲生體貌雄偉孝友謹厚卽位初封楚王置官屬從至中都大定二年四月巳卯賜名允迪立爲皇太子面諭在禮貴嫡所以立汝宜友于兄弟接百官以禮勿以儲位自生驕慢日勉學問非有名命不須侍食上表稱謝自是專心問學與諸儒臣講議於承華殿燕閒觀書乙夜忘倦輒以疑字付儒臣校證九月庚子詔東宮三師對皇太子稱名少師以下稱臣十一月庚子生辰百官賀于承華殿賜襲衣良馬賜宴于仁政殿皇族皆與自後或幸東宮或宴內殿歲以爲常十二月辛卯太子奏東宮賀禮



親王及一品皇族皆北面拜伏。臣但答揖。有所未安。伏望天慈聽臣答拜。庶惇親睦之道。詔從之。立爲定制。上聞博州防禦同知致仕鄭松耆儒且賢。起爲左諭德。特免朝參。專輔太子讀書。松以友諭自處。帝嘗顧松。使取服帶對曰。臣忝諭德。不敢奉詔。帝改容稱善。自是益加禮遇。每出獵。獲鹿輒分賜之。四年九月。納妃徒單氏。行親迎禮。故事。皇太子鹵簿乘金路。禮官不知。請就乘大駕。綴路上。疑其非禮。削禮部郎中李邦直員外郎李山一階。太常少卿武之才丞張子羽博士張桀兩階。頃之議受冊。謁謝太廟。服常朝服乘馬上。謂與外官上後。謁諸神廟無異。海陵一時率意行之。何足爲法。今大冊與三歲祫享。當用古禮。爲是不當輕易如此。時右丞蘇保衡雖漢人不通經史。參政石琚通經史而不言。仍令禮官具前代典禮以聞。朕將擇而處之。會

將授太子冊寶。有司具儀注。備儀仗告太廟。上又言。朕受尊號。嘗用故宋真宗故事。謁謝常朝服乘馬。皇太子乃用備禮前後。不稱語。宰臣良弼守道。此卿等因循不用心所致。皆頓首謝。是年十月。祫享于太廟。行亞獻禮。七年有疾。詔守道侍湯藥。徙居瓊林苑。臨芟殿。調治八年正月。改賜名庚戌。受皇太子冊寶。復上表謝。九年五月。命避暑于草澤。隋王惟功從行。皆給道路費。辭以遠去。闕廷獨就涼地。非臣子所安。上曰。汝體羸弱。山後高涼。故命汝往。丁丑。百官奉辭于都城之北。再拜答之。上詔百官兩具箋。問起居。八月乙酉。還京。百官迎謁如前。丙戌。入見。上曰。吾兒相別。經夏。極甚思憶。九月。詔皇太子供膳歲給五十萬。勿月支。十年八月。在承華殿。經筵太子太保壽王爽啓曰。殿下頗未熟本朝語。何不服去。左右漢官皆用女直人。答曰。凡諸侍

從皆上所置。曷敢輒去。揖爽退曰。宮官四員謂之諭德贊善。善  
可見矣。而反欲去之。無學故也。有使者自山東還。問以民間何  
所苦。對曰。錢難。太子曰。貯之空室。雖多奚爲。仍語戶部尚書張  
仲愈。天子富藏天下。何必獨在府庫。因奏錢在府庫。何異銅鑛  
在野。乞流轉使用。公私俱利。世宗嘉納。詔有司議行之。明年有  
事於圓丘。行亞獻禮。十二年。上聞德州防禦使胡刺謀叛。因曰。  
朕於親親之道。未嘗不篤。何輒敢如此。徐奏叔胡刺性荒縱。耽  
娛樂而無子嗣。如此狂謀。望更闕實之。十月己未。祫享太廟。命  
攝行祀事。十三年。詔太子詹事劉仲誨。東宮官屬尤當選用。正  
人。如行檢不修。及不稱職者。具以名聞。十月。與趙王惟中。曹王  
惟功。獵于保與定州。十一月甲午。還京。十四年四月。太子及諸  
王侍上於垂拱殿。論及兄弟妻子之際。對曰。思齊之詩曰。刑于

寡妻。至于兄弟。以御于家。邦臣等愚昧。願相勵而修之。退而引  
常棣華萼。相承眷令。急難之義。爲文見意。以誠兄弟焉。十五年  
詔五品職事官謝見皇太子。十七年五月甲辰。侍宴于常武殿。  
典食令湼合進粥。將舉食。有蜘蛛在盃中。湼合恐懼。失措從容。  
語曰。蜘蛛吐絲。乘空忽墮。此中爾。豈汝罪哉。十月己卯。祫享太  
廟。十九年四月戊申。有事于太廟。皆命攝行祀事。丁巳。嘗事烏  
林答愿入謝。太子命取幘頭腰帶。官屬請曰。此見宰相師傅之  
禮語。以愿事父皇久。以此加敬。爾皆贊曰。非臣等所及。十一月  
改葬明德皇后于坤厚陵。太子徒行輓靈車。遇大風雪。左右進  
雨具。却之。比至墳所。衣盡濡濕。觀者無不下淚。二十三年。上表  
奏諭熙宗世嫡統緒。海陵無道。弑之自立。削其煬王。俾齒庶人  
之列。而反追崇其親。逆祀于廟。雖以宗幹前殂。不預惡逆。而明

肅帝號禮當削奪。明詔中外，俾知大義。上嘉納之。二十四年，將幸上京，詔太子居守，作守國之寶，以授事于郊廟，并除授五品以上官及利害重者，遣使馳奏其六品以下官與常事，並聽裁決。每三日尚書省於集賢殿啓事，京朝官遇朔望具朝服問候，車駕在路，每二十日一遣使問起居，以達上京。稍稽十日臨行，諭以上京祖宗興王之地，欲與諸王一，到或留一二年，以汝守國，譬之農家種田，商人營利，但能不墜父業，卽爲克家之子。况社稷任重，尤宜畏慎。常時觀汝甚謹，今日能紓朕憂，乃見中心孝道也。對曰：臣在東宮二十餘年，過失甚多，陛下以明德母后之故，未嘗見責。臣誠愚昧，不克負荷，願備扈從。上曰：凡人養子，皆望投老得力，朕留太尉左右丞參政，輔汝，彼皆國家舊人，可與商議。且政事無難，但用心公正，無納讒邪。一月之後，政事自

孰流涕，望辭廷臣爲之感動。其左右侍中親昵者，各爲得意。太子知之，諭曰：我向在東宮，不親國政，日與汝輩話言，步于芳苑，中出入往來，未嘗限阻。今旣守國，汝等有召命，然後得入。五月，駕至，賜以敕書。朕以前月八日到遼陽，此月二日達上京，翌日祀慶元廟，省方觀民古之制也。汝守國任重，夏暑方熾，益當自愛，無貽朕憂。自是凡有所啓，稟輒自披闕，召都事委曲，折正移晷，忘倦。或賜之食，近侍報瑤池位，蓮開當設宴，却之曰：聖上東巡，命我守國，何敢宴遊廢事。採致數花足矣。七月，遣子金源郡王麻達葛奉表起居，兼請還都。十一月壬寅，冬獵辛亥，還二十五年正月乙酉，朔免羣臣賀禮。自守國以來，深懷謙抑，宮臣不令庭拜啓事，時不侍立。京朝朔望日，並停免公服問候。甲寅如春水，二月庚申，還都。丁卯，復遣子奉表賀萬春節。四月，久不雨。

親行祈禱卽日霽是六月甲寅不豫庚申薨于承華殿上還次  
天平山好水川訃聞驚悼爲位行宮之南臨奠大慟者久之親  
王百官皇族命婦及侍衛皆會哭還宮號泣比至中都爲位奠  
哭者七以幽王永成爲中都留守護喪遣左宣徽使唐括鼎致  
祭詔妃及諸皇孫喪服並如漢制其在儲位久恩德在人者深  
每日三時侍衛軍士皆爭入伏哭于承華殿下聲殷如雷中都  
百姓市門巷端爲位慟哭七月壬午朔賜諡宣孝太子九月庚  
寅殯于南園熙春殿已酉駕至未入國門先至熙春殿奠哭比  
葬六往臨之其事世宗凡巡幸西京涼陘及上陵祭廟謁衍慶  
宮田獵觀稼拜天射柳未嘗去左右國有大慶率百官上表賀  
正旦萬春節總班上壽十月庚戌朔宰相以下朝見于慶和殿  
太尉完顏守道上壽世宗追悼悽愴者久之十一月甲申靈駕

發引上親路祭于都城之西庚寅附葬大房山上卽欲加帝號  
以問羣臣修撰趙可舉唐高宗追諡太子弘孝敬皇帝爲對左  
丞張汝弼以爲出于武后遂止乃建廟于衍慶宮後祭用三獻  
樂用登歌及子璟爲皇太孫卽位五月甲午追諡體道弘仁英  
文睿德光孝皇帝廟號顯宗丁酉祠于太廟陵曰裕陵坐平天  
性仁厚不忍刑殺梁樞兒盜金銀葉麟其母老李福典盜段匹  
值坤厚陵禮成家令本把盜銀器值萬春節皆委曲全活之亡  
失物者責其償而不加罪聞四方饑饉輒先奏加賑贍因田獵  
出巡所過問民疾苦敬禮大臣友愛兄弟嘗作重光座銘及刻  
左右銘于小玉碑并刻其碑陰皆深有理致最善射而不殫物  
嘗奉詔拜陵先射一鹿獲之卽命罷獵日足奉祀事焉用多殺  
好生蓋其天性云子琮本名承慶母田氏封克華爲人儀觀

豐偉機警清辯性寬厚好學世宗選進士有名行者納坦謀嘉  
教之女直小字并漢字皆通習及長輕財好施無慍色善吟咏  
不喜聞人過至騎射繪塑之藝皆造精妙大定十八年封道國  
公俱加崇進章宗卽位與諸弟皆遷開府儀同三司琮加封鄆  
王明昌元年授婆速路獲火羅合打世襲猛安留京師五年薨  
上輟朝臨奠諡曰莊靖改莊惠同母弟瓌本名桓篤爲人重  
厚寡言內行修飾工詩精于騎射書藝女直大小字皆通同年  
封崇國公加封瀛王章宗愛其性忠孝兄弟中最爲善人嘗令  
在左右明昌三年末二旬薨帝三臨奠哭之慟敕葬事所須皆  
從官給命工部侍郎胥持國等典喪事諡曰文敬瓚本名阿  
憐母田氏早卒溫妃石抹氏養爲子大定二十五年封宿國公  
進封沂王明昌四年爲趙王永功後六年溫妃薨上問所服禮

官張暉奏慈母服齊衰三年桐杖布冠禮也于爲近親至尊壓  
降與臣下不同乞於未葬以前服白布絹巾既葬止用素服終  
制朝會純吉上從其奏永安元年任兵部尚書改封蔡王四年  
除秘書監泰和五年賜名從彙八年改封霍王貞祐二年薨上  
輟朝琦本名君里不母劉氏封茂儀琦封壽王永安元年郊  
恩進封英王四年改封瀛王同時賜名從憲明年授秘書監爲  
人風儀秀峙性寬厚善騎射待府僚以禮秩滿去者皆有贖帝  
尤愛重八年三月初以病聞上卽臨問賜錢五百萬還宮詔府  
僚止其疾增損狀仍敕門司夜一鼓卽奏比五更重言之及薨  
上哭之慟爲輟朝臨奠者再諭有判大睦親瀆事宛王永升言  
王家事叔宜親畫時二姬方孕若生子卽以付之以右宣徽使  
移刺都護其喪葬斂以內庫之服所須亦從官給諡曰敦懿

玠本名謀良虎母王氏封婉儀自幼穎秀性溫厚好學初封溫  
王薨年十一諡曰悼敏

庶長子承中本名實魯刺又名萬僧母元妃張氏父玄徵母高  
氏與世宗母貞懿皇后葭葦親生承中而卒追封宸妃又贈惠  
妃承中初封許王判大興尹進封越與趙王拜樞密使遇明德  
皇后改葬坤厚陵元妃亦同陪葬發引之日承中以元妃柩先  
行使執黃繖者前導俄頃皇后柩出磬寧宮少府監張謹言呼  
執繖者不應欲奏其事太子不較以爲繖人之誤乃止二十一  
年改判大宗正事心懷不悅太子復勸宗正之職自親及疎自  
近及遠此親賢之任且皇子之貴豈以官職閑劇爲計耶承中  
乃喜及幸上京并留輔太子居守會遣石古乃奉表起居世宗  
喜語豫國公主言太子孝德天成先遣其二子繼遣此兒兄弟

相友愛如此及太子薨承中於諸子最長上召赴行在加開府  
儀同三司明年復爲樞密使賜諸孫名石古乃曰瑜神上門曰  
璋阿思懣曰玘阿離合懣曰瑒有司奏擬僉從上曰兒輩尚幼  
若奉承太過使侈心滋大卒難節抑諸兒弟入侍朕當其語笑  
娛樂之際必淵默莅之庶使知教戒之意遂不許二十七年玘  
與瑒俱年十五以上加光祿大夫奉國上將軍章宗卽位起復  
承中判西京留守進封漢王與諸弟各賜金五百兩銀五千兩  
錢二千貫重幣三百端絹二千匹再賜承中修公廨錢三百萬  
特加瑜銀青榮祿大夫及孝懿皇后崩吳王永成隋王永升奔  
喪後期各罰俸一月杖其長史五十承中適有寒疾不能至上  
怒頗意諸王有輕慢心遣使責承中曰已近公除亦不須來二  
月丙戌禪祭承中始至入臨辛卯始克行燒飯禮壬辰及諸王

朝辭賜遺留物又進封并王判平陽府事至鎬王上頗嫌忌諸王置王傅府尉名爲官屬實檢制之府尉希望風旨過爲苛細自分已老動有掣制情思鬱鬱不堪乃表乞閒居不許及永昭以謀逆誅增置諸王司馬一員檢察門戶遇毬獵游宴皆有制限家人出入悉爲禁防河東提刑判官把里海坐私謁永中杖解其職前近侍局副使改西京留守同知裴滿可孫亦因受屬爲瑜求官免之母舅張汝弼妻高陀幹自元妃薨畫像奉之甚謹挾左道爲永中求福希覬非望坐以誑祝誅上疑事在永中會王傅尉奏瑒因防禁嚴密語涉不道詔尉簽大睦親府事膏中丞孫卽康鞠問并求得璋所撰詞曲有不遜語家奴德哥首水中嘗與侍妾瑞雪言我得天下以爾爲妃詔遣官覆按狀同再遣禮書張暉兵侍烏古論慶壽覆訊上詔宰臣鎬王祗因語

言與永昭罪異參政馬琪曰若以人臣無將言則一也左相清臣亦言王素有妄想之心詔宣示罪狀百官雜議皆曰請論如律惟宮籍監丞盧利用乞貸之詔乃賜死瑒與璋皆棄市救有司用國公禮收葬妻子威州安置泰和七年詔復王爵賜諡曰厲敕瑜等於威州擇地以禮改葬歲時祭奠貞祐二年復使妻子鄭州三年太康縣盜劉全亡入衛真界詭托石古乃自稱愛王實無是封假以惑衆與同縣人時溫謀爲亂誘王氏女爲妻溫稱東平人李寧居嵩山有妖術可論大事使范元書僞號召之寧至推爲國師議僭立事覺諸人皆伏誅四年潼關破復徙子孫於南京興定二年譙縣人孫學究私造妖言云愛王終當奮發今匿迹民間自號劉二衛真百姓王深等皆信以爲然有劉二者出而當之遣歐榮輩結構逆黨市兵杖大署旌旗謀僭

立事覺被誅死五十二人緣坐六十餘人自此禁錮子孫幾四十年天興初始弛之

永蹈初名石狗兒大定初封滕王進徐王二十五年加開府儀同三司明年爲大興尹章宗卽位判彰德軍節度使進封衛王明昌二年徙封鄭王三年改判定武軍時元妃李氏方寵于上王本其子有郭諫者妄言大王相貌非常王妃及二子皆大貴崔溫馬太初二人私論讖記熟於天象溫言丑年有兵災屬免命者來春當收兵得位太初亦言昨見赤氣犯紫微白虹貫月皆主丑後寅前兵戈僭亂永蹈深信其說陰結內侍鄭兩兒伺上起居以溫爲謀主諫太初往來游說因妹韓國公主適河南統軍使僕散揆欲取其軍以爲助與妹澤國公主長樂謀使駙馬都尉蒲刺覩致書于揆且先請婚以觀其意揆拒却其婚使

者不復敢言家奴董壽知之以諫不聽同輩千家奴土變詔鞫問連引甚衆久不能決右相夾谷清臣奏曰事貴速絕以安人心乃賜永蹈及妃卞玉二子按春阿辛公主長樂皆死以財產分賜諸王財物分賜諸公主蒲刺覩崔溫郭諫馬太初等皆伏誅揆以不豫聞祇坐除名董壽免死隸監籍千家奴賞錢二千貫特遷五官雜班敘使久之帝意頗悔泰和七年詔復王封備禮改葬賜諡曰刺

永功本名宋葛又名廣孫永中同母弟貞元二年生性沉默寡言笑勇健絕人涉獵書史好法書名畫大定四年封鄭王七年改封隋王十一年又進曹王十五年除刑部尚書上令學其舅汝霖爲政十七年授活活土世襲猛安十八年改大興尹世宗幸金蓮川怒親軍二蒼頭縱馬食民田詔令各杖一百彈壓二



百戶失覺察勒停永功奏親軍止一蒼頭兩彈壓服勤日久請  
量決蒼頭償其田直憐察彈壓令其待罪上皆從之有老嫗因  
失男婦告于伍長蹤跡之忽見一男子私殺牛手持血刃望見  
伍長意其捕已卽行走避嫗與伍長疑是殺其婦也捕送縣不  
勝楚毒遂誣服問尸安在詭曰棄之水中偶獲一尸已半腐信  
以爲是卽具獄上永功疑之曰婦死幾何而尸遽半腐哉頃之  
嫗果得其婦於男子所私者遂釋又發武清黃氏望雲汪氏豪  
猶不逞劾正其罪畿內肅然二十三年判東京留守改河間尹  
復爲北京留守凡七月改東京留守從世宗幸上京明年命護  
皇太子喪事尋拜御史大夫章宗封原王兄弟皆加開府儀同  
三司明年判大宗正事以與應州僧有舊爲囑事于彰國軍節  
度使移刺胡刺事聞解職章宗卽位嘗免朝參除判平陽府進

封冀王濟南先帝舊治風土甚好改判其府復授山東西路把  
魯古世襲猛安歷判廣寧彰德府事進封魯王永安元年又進  
鄧王歷判太原中山府事衛紹王卽位進封譙王明年又進封  
越從遷汴京詔每月朔一朝興定五年有疾賜御藥及尙醫診  
視薨上哭之慟諡曰忠簡子福孫賜名璐壽孫名璫粘沒曷名  
琳璫字仲實一字子瑜資質簡重博學有俊才喜爲詩工真  
草書大定二十七年與璐俱爲奉國上將軍明昌初又同加銀  
青榮祿大夫衛紹王進開府儀同三司貞祐中封胙國公正大  
初進封密國公璐蕭國公爲興陵崇妃養子兄弟奉朝請泰和  
五年璐卒輟朝百官進名奉慰璫日以講誦吟咏爲事與文士  
趙秉文楊雲翼雷淵元好問李汾王飛伯輩交善南遷得盡載  
法書名畫居汴中家口多俸入少客至不能具酒餽蔬飯共食

焚香煮茗。盡出藏書。談大定明昌以來故事。樂而不厭。終日不聽客去。天興初。臥疾。論及時事。嘆曰。兵勢如此。已不能支。祇可納降。以全完顏一族。歸吾國中。使女直不滅。則善矣。餘復何望。見哀宗於隆德殿。相顧泣下。曰。近聞曹王欲出議和。其年尚幼。未經諳練。恐不能辦大事。臣請副之。或代其行。慰以此承平時。無事。置叔父冷地。無所顧藉。緩急則置于不測。叔父盡忠。固可。天下其謂朕何。乃罷。未幾。以疾薨。年六十一。平生詩文甚多。自選詩三百。樂府百號。如菴小燕。第五子守禧。字慶之。風神秀徹。特所鍾愛。平日所蓄書畫。盡以付之。及汴城降。年未三十。病卒。永德。本名訛。出大定二十七年。封薛王。明年。除秘書監。又明年。進封瀋王。明昌初。授山東東路把魯古必刺。猛安三年。進封幽王。五年。遷勸農使。承安二年。進封潞王。衛紹王立。累遷太子太

師。宣宗卽位。同判大睦親府事。興定五年。改判府事。卒。子幹論。賜名琰。

永成本名鶴野。昭儀梁氏所生。風姿奇偉。自幼喜讀書。博學善屬文。世宗尤愛重之。大定七年。始封瀋王。以太學博士王彥潛爲府文學。令師事之。十一年。進封幽王。十六年。判秘書監。明年。判大睦親府事。授世襲中都路胡土謁哥蠻猛安。二十年。改授翰林學士。承旨二十三年。判定武軍節度使事。尋改判廣寧府。世宗幸上京。命留守中都。判吏部尚書。爲御史大夫。章宗卽位。起復。進封吳王。判真定府事。明昌元年。改山東西路。益買必刺。猛安。明年。進封克王。坐率軍民圍獵。以爲擾民。解職。就封奉表。謝罪。上賜手詔。戒之。未幾。授沁南軍節度使。三年。改判太原府事。誕日上親。爲詩以賜。有美譽。自應輝玉牒。忠誠不待啓。金滕。

之語當世榮之七年改判平陽府事永安元年覃恩進封豫王  
明年冬進馬八十疋以資守禦賜詔獎諭稱皇叔不名五年再  
任俄召還以疾不能入見上親幸其第臨視泰和四年薨上爲  
震悼賻贈甚厚購其遺文謚曰忠獻爲人夙有雋望晚年所學  
益醇每暇日引文士相與切磋接之以禮未嘗見有驕色自號  
樂善居士有文集行于世

永升本名斜不出母才人石抹氏大定十一年封徐與處王二  
十七年判吏部尚書授山東西路按必出虎必刺猛安章宗卽  
位徙封隋王除定武軍節度使明昌二年改封曹王又改封宛  
衛紹王徙夔王宣宗時年高羸疾詔宮中聽扶杖尋薨旣殯燒  
飯上親臨奠

衛紹王六子大定二十六年賜名猛安曰瑫按辰曰  
璫泰和七年命出繼鄭王永蹈後下詔朕念鄭王自棄天常以  
干國憲彙葬曠野忽諸不祀歷歲旣久深用愴然親親之情有  
懷難置稽考古禮以衛王子按辰爲永蹈後謹奉祭祀卿其念  
之大安元年封六子皆爲王惟從恪惟王有考餘任王鞏王弗  
傳是歲從恪爲左丞相二年八月立爲皇太子至寧末與后徒  
單氏俱削名號廢居中都貞祐二年與鄯厲王皆徙鄭州禁其  
出入婚嫁四年又徙南京凡禁錮二十餘年天興元年方弛其  
禁後崔立冊爲桀王汴京破死焉

宣宗諸子長名守忠母名氏不可考胡沙虎旣廢衛王宣宗尚  
未至卽迎守忠入居東宮卽位立母爲后自王氏姊妹入宮后  
寵遂衰尋爲尼守忠爲皇太子冊禮待邊事稍息然後舉行本  
年十月己未以鎮國上將軍太子少保阿魯罕爲太子少師上

遣諭旨時方艱難朕宮中每事裁減汝亦宜知斟酌樽節東宮無用者宜出之汝讀書人朕特用之遷汴留守中京至七月復召至三年正月薨上數臨奠殯所有司奏辰日不哭上曰父子至親何可拘忌四月葬迎朔門外五里諡莊獻五月立其子鏗爲皇太孫二歲薨賜諡冲懷太孫

次守純本名盤都貞祐元年封濮王皇女溫國公主二年爲殿前都點檢兼侍衛親軍都指揮使權都元帥上諭帥府濮王年幼公事殊未諳卿等毋以朕子不相規戒宜令凡見將校可謙和接遇三年爲樞密使四年拜平章政事奏知管差除令史梁獻誤書運副張正倫宣命乞治罪上曰令史有犯宰臣自當治之何必關朕與定元年進封英王授世襲東平府路三屯猛安上以監察御史程震言戒諭守純始吾以及汝爲相者庶幾相輔

不至爲人譏病耳汝乃惟飲酒耽樂公事慢不加進吾嘗聞人言已過雖自省無之亦未敢容易去懷今諸相皆老臣每事與之商畧使無貽物議足矣四年九月守純欲發丞相高琪罪密召知案蒲鮮石魯刺令史蒲察胡魯員外郎王阿里謀之囑令勿泄諸人反告都事僕散奴失不以白高琪及琪伏誅幼奴失不處死石魯刺胡魯各杖勒停哀宗卽位進封荆王平章政事改判睦親府封母龐氏荆國太妃有告守純謀爲不軌下獄推問皇太后言于帝獲免所生三子長曰訛可封肅國公次日幸德封華王又次戴王天興初守純府第產肉芝一株高五寸許色紅鮮可愛旣而枝葉津流濡地成血臭不可聞剷去復生者再夜則房榻間羣狐號鳴秉燭逐捕復失所在踰年崔立亂遂及諸宗室皆死青城訛可初封荆王改曹王天興元年元兵

北行留速不解攻城攻具已辦議王將出質且退癸卯立攻具  
沿濠列木柵驅漢俘及婦女老幼負薪草填壕頃刻平者大半  
主兵者以議和之故不敢與戰但於城上坐視上從六七騎出  
端門至舟橋人聞車駕忽出老幼遮擁驚愕失措咸跪道傍并  
望拜時新雨泥濘至有誤觸御衣者上手麾勿拜恐泥汚汝衣  
倉皇中市肆米豆狼藉於地亦令衛士收還各家俄頃宰相從  
官皆至進筮不受曰軍士暴露我何用此所過輒加慰勞皆踴  
躍呼萬歲咸願出戰死無所恨平章傳令勿放一鏃恐壞和事  
上顧謂其中長者云朕爲生靈稱臣進奉無不從順止有一子  
尚未成長今往作質子矣汝等畧忍待曹王出大兵不退死戰  
未晚復有拜泣者曰事急矣聖主毋望和事乃傳旨城上放箭  
西水門千戶劉壽控御馬仰視曰聖主無億賊臣賊臣盡大兵

退矣衛士欲擊之上止勿問是日曹王出詣軍前大兵併力進  
攻甲辰上復出撫東門將士以內府金帛自隨待賞有功太學  
生楊奐等前白臣等皆朝廷作養今執砲夫之役恐非國家百  
年以來待士之意敕記姓名卽免其役過南薰門值被創者親  
傳以藥手酌卮酒以賜乙巳鳳翔府砲軍萬戶王阿驢樊喬來  
歸取宋太湖靈壁假山石造砲小人各有斤重圓如燈毬有不  
中度者杖其工人大兵用砲祇破大礮或用碌礮爲二三攢竹  
砲有至十三稍者餘砲稱是每城一角置砲百餘枚更遞下上  
晝夜不息不數日石幾與裏城平而城上樓櫓皆故宮及芳華  
玉谿所拆合抱大木隨擊而碎護以馬糞麥秸網索旃褥其懸  
風板外又障以牛皮隨卽延燒不可撲救惟城乃周世宗取虎  
牢土所築堅硬如鐵砲所擊處惟凹而已大兵壕外築圍百五

十里亦有乳口樓櫓壕深澗皆丈許初白撒命築門外短牆委曲陔隘祇容二三人過以防大兵奪門。及是諸將請乘夜斫營比出已為北兵所覺。又募死士千餘穴城渡壕燒其砲宰執坐城上懸紅紙燈為應約燈起渡壕亦為圍者所覺。又放紙為以誘被俘者所為皆兒戲。右丞世魯又命效先時河朔作江水曲使城上人靜夜唱之以寄謳吟之思。其謬計如此。後不知所終。

引簡錄卷二百二十五

引簡錄卷二百二十六

明刑部員外郎仁和弘齋邵經邦學

皇清翰林院侍講學士四世孫遜平校閱

載記 金內族六

婁室 子活女謀衍石古乃 銀木可 子敬英弟麻吉拔離

習古迺 孫襄 附王澤 思烈 胡實咬 阿魯 薩懶

蒲盧火 子吾札忽 附神土懣 撒改 吾丹 阿里刺三寶 崇成 阿喜

婁室字幹里衍父白荅為完顏部水諸部長太祖克寧江州

使婁室招諭係遼籍女直遂降移嶽益海路太彎照撒等敗遼

兵于婆刺趕山復擒兩將軍降益改捺末懶兩路進克咸州諸

部相繼來降復獲遼北係籍女直值都統耶律訛里等二十

餘萬戍達魯古城與銀木可縱兵衝其中堅凡九陷皆力戰

而後復與銀木可成邊及九百奚營等部來降又同攻黃龍府  
助以完顏渾黜婆盧火石古乃兵四千敗遼兵萬餘于白馬濼  
宗雄等下金山縣又使分兵二千招沿山逃散之人與幹魯古  
破耶律捏里軍于蒺藜山取顯州請於太祖謂黃龍府一大都  
會且僻遠苟有變易與隣郡相扇而起太祖然之命以所部合  
諸路謀克爲萬戶屯守其地再進都統從杲取中京與子活女  
從宗翰襲奚王霞末活女兵三百敗敵二千降奚部西節度訛  
里刺追遼主至白水濼獲其內庫寶物與闔母攻破西京夏人  
救遼兵次天德候兵突撚補額二百騎敗沒院士罕復以二百  
騎往遇伏獨白脫歸時久雨諸將欲且休息奮語吾兵再破若  
不復往彼將以我爲怯亟遣千騎與弟拔離速及習失往幹魯  
壯其言從之遂不遲明出凌野嶺留收部逃兵二百據險守之

獲生口開其帥李良輔將至登高望之夏人方濟水爲陣恃衆  
不整使人速報幹魯婁室乃分軍爲二更迭出入轉戰三十里  
過宜水與幹魯合擊敗之又與照里馬和尚生獲遼都統大石  
於奉聖州龍門東二十五里悉降其衆守臣闕里刺棄州城逃  
去又與宗望追遼帝敗其三軍于三山有千人將趨奉聖州  
復與蒲察擒其主帥而還夏人屯可敦館宗翰遣往戍朔州築  
城於霸德山西南二十里遂破朔州西山兵二萬擒其帥趙公  
直以獲遼帝于余睹谷賜鐵券銀木可圍太原宋統制劉臻率  
衆十萬來救出壽陽破之繼敗榆次兵數千宋張灝軍出汾州  
拔離速擊走之灝復營文水再與突葛速拔離速大敗之取汾  
石二州及其屬縣溫泉方山離石蒲察降壽陽取平定軍及樂  
平復招降遼州及榆社遼山和順諸縣遂自平陽先趨河南破

宋兵於孔子廟南遂降河陽取偃師未安軍降鞏縣撤刺咎  
收宋兵於汜水降滎陽滎澤鄭州中牟又遣率師趨陝津攻河  
東未下郡縣阿離士卒敗敵于河上撤按敗敵于陝城下鶴沙  
虎降虢州守陴卒三百人遂克陝府習古乃桑袞破陝之散卒  
于平陸西北婁室破蒲解軍二萬盡覆之安邑解州皆降遂克  
河中府降絳慈隰石等州又使取陝西敗宋將范致虛軍下同  
華二州克京兆府獲宋制使傅亮遂克鳳翔宗翰命婁室專事  
陝西以婆盧火繩果監戰遇敵於蒲城及同州臨真皆破之進  
克丹州延安府遂降綏德軍及靜邊懷遠等城寨十六復破青  
澗城宋安撫使折可求以麟府豐三州及晉寧所部九寨皆降  
惟晉寧軍久不下規其城中無井引河水爲飲東決其渠泄  
之城中始困殺守將徐徽言遂降定安堡渭平寨及鄜坊三州

詔以婁室婆盧火守延安折可求屯綏德蒲察還守蒲州延安  
鄜坊皆殘破人民存者無幾爲置官府輯安之別將韓論等與  
阿盧補謀里也至三原建昌軍復叛討平之進兵降乾州克邠  
州軍于京兆所降城邑多叛上以爲倦于兵命宗輔代之與張  
浚戰于富平會宗弼左翼軍已却婁室力疾以右翼鏖戰遂破  
巨敵宗輔稱其力狗王事雖古名將何以加之輟所用犀玉金  
銀器及甲冑并馬七匹與之大會八年十二月丁丑薨贈太子  
太師恭寧軍節度使兼侍中皇統元年加贈開府儀同三司追  
封莘王正隆例改金源郡王配享太宗廟庭諡莊義 活女年  
十七從攻寧江州力戰創甚扶出陣間太祖憑高望見知之撫  
慰賜藥歎以他日必爲名將攻濟州敗敵八千復戰信州移刺  
本陷敵陣力戰出之敵遂北又敗耶律佛頂等兵于瀋州從攻



乙室部破其二營迭刺部族叛率二謀克突入大破之從圍太原宋將种師中援兵十萬出井陘敗之于殺熊嶺斬師中于陣大軍至河無船不得渡父遣率兵三百循水上下自孟津而南度其可渡引以先濟大軍皆隨之宋將郭京出兵數萬趨父營活女從旁奮擊衆亂遂破之師還復破敵於平陸渡得其船以濟又捷於張店原時屯招太平翼城皆有重敵並破之又分兵取陝西蒲州降卽留鎮之攻鳳翔先登宗輔定陝西以爲都統進攻涇州敗王開山以兵拒歸路邀戰再擊敗之遂降京兆鳳翔諸縣襲父合扎猛安代爲黃龍府路萬戶天眷三年爲元帥右都監遷左監軍府罷改安化軍節度使歷京兆尹封廣平郡王正隆例改封代國公進隋國公卒年六十一諡貞濟 次子謀衍勇力過人善用長矛突戰天眷間克卽卽祇候授顯武將

軍擢符寶郎皇統四年其兄讓以親管奧吉猛安俄權濟州路萬戶八年爲元帥右都監天德三年授順天軍節度使歷河間臨滹尹數月改婆速路兵馬都總管往討撒八遇世宗于常安縣盡以甲士付之因率諸將吏民勸進卽位拜右副元帥命伐白彥敬志寧於北京遇其衆于建州之境皆不肯戰二人遂降會討窩斡屯兵懿州慶雲縣及川州武平縣奏請糧運并護送兵仗詔以南征逃還軍士就往如不足量於富家簽調率諸軍將會濟州時賊新敗于泰州獲其謀者知敵將由別路邀糧運遂分軍往迎之以貪鹵掠不復追敵得縱去上聞之下詔切責朕委卿等討賊乃聞不就賊趨戰而駐兵閑緩經涉累月雖曾追襲不由有水草之地以致馬足疲弱不能百里面還後雖破賊又縱諸軍劫掠數日後方追北霧霰河輒復引還朕欲重譴

以方任兵事且圖後功當盡心一力毋得似前怠弛其子斜哥  
暴橫軍中勒歸本貫謀衍至京師以同判大宗正事未幾速頻  
路軍士木里古告斜哥寄書與謀衍謀反世宗察其誣詔鞠告  
者誅木里古仍召謀衍面諭宐悉朕意上初慮窩斡方熾而温  
迪罕阿魯帶因妻生日輒離軍中賊衆聞之來襲殺傷士衆遂  
坐除名詔謀衍蒲察烏里雅蒲察通引兵三千擊之擒賊黨猛  
安合住未幾窩斡平乃還大定七年上因其故老欲均勞逸出  
爲北京留守御便殿賜食及御服衣帶佩刀尋改守東京封榮  
國公十一年薨年六十四爲人性忠厚善擊毬射獵時論以爲  
雖智畧不及其父而勇敢肖之 又次石古乃名仲體貌魁偉  
通女直契丹漢字韓魯愛其才欲使通吏事每視事常令在左  
右遇事輒問之應對如響嘆以必爲合器皇統初克護衛授世

襲謀克天德元年攝其兄濟州萬戶部內稱治除濱州刺史母  
憂起復知積石軍事轉河南尹同知正隆伐宋爲神勇軍副都  
總管還除大興尹同知將兵二千以脩契丹遷西南路招討使  
兼天德軍節度使政尚忠信決獄公平蕃部不敢寇邊召爲左  
副都點檢宿衛嚴謹小心畏慎每事有規矩後來者守其法莫  
能易世宗常語侍臣遇仲人直朕寢益安五年宋人請和爲報  
問使請與宋上相見禮儀論以親起立接書則授之及至遂一  
如禮上嘉之轉都點檢兼侍衛親軍都指揮使遷河南路統軍  
使論以江淮重地益宜勉之賜廐馬金帶玉吐鶻復有罪解職  
久之起爲西北路招討使改北京留守卒 族子海里體貌豐  
偉善用稍從婁室爲黃龍府萬戶徙於執吉訛毋復從追及遼  
主於朔州阿敦山婁室遣與木得往見遼主論之使降時已窮

張簡  
卷一百一十一  
三  
蹙待於阿敦山東婁室因獲之賞金銀幣帛錦絹宗輔經畧陝  
西戰却吳玠軍於涇邠之南尋遣修棧道宋人以兵來拒破之  
又賞銀百五十兩奴婢十人天眷元年擢宿直將軍與定宗繫  
宗雋之亂遷廣威將軍除都水使者改西北路招討都監歷復  
灤二州刺史耶盧椀群牧使迭刺部族節度使同知大典尹兼  
中都路兵馬都總管改武寧軍節度使終廣寧尹年六十二  
銀朮可當太宗嗣位以取阿疎事久不決使與習古迺繼往還  
言遼主荒于政事上下解體有可取之狀太祖信二人言自此  
決意伐遼從戰達魯古城破遼兵二十餘萬語咸見婁室傳收  
國二年分鴨撻阿懶所遷二千戶以爲謀克屯寧江州遼大冊  
使習泥烈遣回約以七月半至燕九月未來上使諸軍過江獲  
遼邊吏乙薛所使曳刺麻答十三人兵士八人縱火於渾河以

絕芻牧太祖命釋之俄從都統杲克中京與習古迺蒲察胡巴  
魯率兵三千擊奚王霞末于京西七十里霞末棄兵逃遼主西  
奔天德銀朮可以兵絕其後遂見獲後從宗翰伐宋圍太原未  
下命留兵守其圍宋樊夔施誥高豐等軍來救太原分據近部  
銀朮可與習失孟魯完速大破之索里乙室破宋兵近縣已降  
援兵復入據太谷祁縣阿鶻懶拔離速仍拔取之預攻种師中  
使幹論破其軍撒里土又敗宋軍於回馬口太原已定復攻克  
汴城師還降岢嵐寧化等軍拔嵐州招降火山軍賜鐵券又取  
鄧州殺其將李操等擒轉運使劉吉鄧州通判王彬宗翰會伐  
康王使獨守太原天會十年爲燕京留守十三年致仕加保大  
軍節度使同中書門下平章事遷中書令封蜀王天眷三年四  
月癸丑薨年六十八正隆例改金源郡王配饗太宗廟庭大定

十五年諡武襄改配享太祖廟庭弟麻吉拔离速子毅英本  
名撻懶幼警敏有志膽初卅角太祖見而奇之年十六授世襲  
謀克從父伐遼爲先鋒伐宋守太原圍皆在行間屢有功宋兵  
數萬來救至南關父叔與婁室等擊之當隘巷一卒揮刀向拔  
离速毅英以刀斷其腕又一卒從旁刺之復斷其槍追殺之拔  
太原下河東諸州攻汴京皆有功與都統馬五狗地漢上至上  
蔡以先鋒破孔家軍宗輔攻開州毅英先登流矢中其口創未  
愈復強起攻大名府第功次于宗弼攻東平功居最拔離速襲  
宋楊州以爲先鋒又追孟后前行趨潭州宋兵駐常武選卒薄  
其城敗千餘人城中出兵來戰又敗之獲馬二百匹遂攻常武  
拔离速諸軍爲大陣居其後毅英以五百騎爲小陣前行馳宋  
軍宋軍亂遂大敗之其周旋進退皆有法則拔离速莫賞之後

因河東郡縣多叛命以先鋒攻克絳州復攻沁州飛砲擊其右  
脅昇歸營中諸軍攻沁三日不能下骨赧強起指麾士卒遂克  
之遷攝河東路都統從左監軍移刺余睹招西北諸部將騎三  
千五百平其九部獲生口三千馬牛羊十五萬又以先鋒破宋  
吳山軍再戰再勝衄之于隘死者不可勝計宋兵遁去宗弼再  
取和尚原仍以本部破宋五萬人奪新义口留兵守之是夜大  
雪道路皆冰宋兵勢重不可徑取宋弼用其策自傍近高山叢  
薄間入出其不意遂取和尚原請速入大散關宗弼止之毅英  
先攻仙人關不止宗弼以刀背擊其兜鍪使之退謂敵氣已沮  
不乘此而取後必悔之已而果然宗弼嘆曰旣往不答乃班師  
復爲後殿以備伏兵且戰且却遂達秦中齊國初廢命撒离喝  
撫治諸郡至同州故齊觀察使李世輔出迎陽稱墜馬折臂昇

歸伺方入城詐使通判獻甲廳事隨以壯士十人世輔自壁後  
突出執撒离喝變起倉卒殺英方索馬于外不得入城門已閉  
至東門遇合荅雅領騎三十餘與斬門者而入世輔擁衆自西  
門出三人合襲之一進一退以綴世輔慮救兵至反要撒离喝  
與之盟勿使追之殺英聞撒离喝聲與騎而歸除安遠大將軍  
攝太原尹四境咸治兼攝河東南北兩路兵馬都總管會復取  
河南陝西地師至耀州宋人每旦出城張旗閱隊抵暮而還道  
隘騎不得逞殺英請兵五百伏山谷間薄暮先使五十人趨山  
巔令旦日視城中人出闕舉旗伏兵發宋兵爭馳入城殺英麾  
軍登城拔宋幟立金旗幟宋兵內外望見皆降宋吳玠擁重兵  
據涇州涇原以西多應之撒离喝欲退守京兆俟河南河東軍  
勸以我若退守玠必取鳳翔京兆同華據潼關吾屬無類矣不

如速戰我軍陣涇之南原宋兵必自西原來吾與斜補各以選  
騎五百摧其兩翼使拔离速當其中元帥據岡亭多張旗幟爲  
疑兵可以得志從之玠兵果自西原來二將擊其左右自旦至  
午玠軍少退拔离速當其前衝擊之遂敗玠軍僵尸枕藉大澗  
皆滿自此蜀人喪氣不敢復出關陝遂定歷行臺吏工二部侍  
郎從宗弼巡邊遷刑部尚書轉元帥左都監天德二年遷右監  
軍府罷改山西路統軍使領西南西北兩路招討使坐無功降  
臨海軍節度使歷平陽太原尹正隆末爲中都留守兼西北面  
都統討契丹撤入駐軍歸化州世宗卽位使其姪阿魯瓦持詔  
拜爲左副元帥就宣大定改元赦于西南西北招討司調河東  
河北山東諸路州鎮猛安軍屯京畿殺英猶豫未決士卒皆欲  
歸附乃不得已受詔下令諸路亟泥馬槽二萬具然後遣人宣

引簡錄 卷二百二十六  
赦諸路聞之。以為大軍且至。故皆聽命。元年十一月以軍至中  
都。同知留守璋請至府議事。疑其有謀。陽為許諾。率騎竟從施  
仁門出。駐兵通州。見世宗于三河。詔以便宜規措河南陝西山  
東邊事。三年至南京。復汝潁嵩等州。縣授世襲猛安。頗恃宿將  
功。貨不恤軍民。詔使問邊事。不荅。謂爾解何事待我。到闕奏  
陳。及拜平章政事。多自專。已所欲。輒奏行之。罷為東京留守。忿  
怒。不接賓客。雖貴近亦然。改濟南尹。上數以朕念卿父子咸有  
大功。故授此職。卿宜知之。若復不悛。非但不保官爵。身亦不能  
保也。頓首而謝。久之。改平陽尹。致仕。起為西京留守。母憂。起復。  
仍守東京。帝以上京王業所起。風俗日偷。宗室聚居。號為難治。  
卿元老大臣。眾所聽服。以為留守。當正風俗。檢制宗室。持以大  
體。十五年致仕。居北京。會脩太廟。兩朝實錄。當時舊人親見者。

惟毅英在。詔脩撰溫迪罕締達。就其家問之多所。更定十九年  
薨。年七十四。麻吉年十五。隸軍中。從破高麗兵于寧江州。平  
係遼女直。克黃龍府。皆身先力戰。以功為謀克。繼領猛安。又破  
奚兵千餘。從幹魯古攻下咸信潘州。及東京諸城。皆有功。都統  
杲取中京。與稍合胡拾塔別降。楚里迪部屯兵高州。以兵援蒙  
刮孛董。大破敵兵。復敗恩州兵五萬人。討平遼人聚中京山谷  
者。降三千有餘。戰于高州境上。伏矢射之中目。遂卒。凡經大小  
三十餘戰。所至皆捷。皇統中。贈銀青光祿大夫。諡毅敏。子沃  
側。年十七。隸軍中。從拔鹵速擊遼將馬兀敗之。父死。領職從宗  
望伐宋。至河上。宋兵屯于河外。以二舟水伺我師。遣率勇士數  
輩。以一舟往迎。盡俘以還。又從襲康王於江淮。師還。駐東平。及  
廢齊屯兵河北。招降旁近諸營。多獲畜產。兵仗軍帥嘉之。賞以

甲馬從攻陝西爲右翼都統攻城破敵皆與有功師還正授謀  
克遷華州防禦使屬關中歲饑盜賊充斥募兵討平之部以無  
事郡人列狀丐留不報未幾除迪列部族節度使改迭刺部薦  
舉廉能入爲都水使者秩滿同知燕京留守事爲西北路招討  
使以發撒八秩滿冒俸不卽解去撒八反遂遇害 拔离速天  
補六年宗翰在北安州將會斜也于奚王嶺遼兵奄至古北口  
使蒲盧火將兵二百擊之渾黜亦將二百兵爲後援渾黜聞知  
遼兵多請濟師宗翰欲自往希尹婁室曰此小寇易與耳請以  
千人爲公破之渾黜至古北口遇游兵遂入山谷遼步騎萬餘  
迫戰死者數人渾黜退據關口希尹婁室至拔离速訛謀罕胡  
實海摧鋒奮擊大破之斬馘甚衆盡獲甲冑輜重希尹與撒里  
古獨裴滿突然敗其伏兵殺千餘人獲馬百餘匹遂與宗翰至

奚王嶺期會于羊城灤俱見前傳天會四年克太原以爲管勾  
太原府路兵馬事與婁室敗宋兵于文水遂從宗翰圍汴與銀  
术可畧地襄鄧入均州還攻唐蔡陳三州皆破之克穎昌府復  
與秦欲馬五襲宋康王于楊州天會十五年遷元帥左都監宗  
弼再定河南撒離喝經畧陝西至涇州拔離速大破宋軍于渭  
州渭與德順軍皆降陝西平遷元帥左監軍加金吾衛上將軍  
卒諡敏定

習古迺亦作實古迺昭祖之孫從太祖拒遼兵使與銀术可鎮  
守達魯古城及取居庸關使往追蕭妃不及久之爲臨潢府軍  
帥討平迭刺其羣官率衆降者請使就領諸部太宗賜以空名  
宣頭及銀牌俾以便宣授之獲遼許王莎邏駙馬蕭乙辛始知  
遼梁王在紇里木并雅里自立於是徙遼降人於泰州習古迺

言時暑未可徙請姑處之嶺西詔築新城於契丹周特城置之  
朝命因平州烏虎里部人迪烈割沙率部族降以撻僕野爲本  
部節度使烏虎爲都監習古迺封還宣詔以便宜各授散官填  
空名告身付之轉錄降附有勞故官八百九十三人加迪烈防  
禦使爲本部節度使割沙諸司使爲節度副使知迪烈底部事  
撻離答加左金吾衛上將軍知突鞠部事阿杲加觀察使其餘  
遷授有差朝廷從之仍以龐葛城地分賜烏虎里迪烈底二部  
及契丹人其未墾者聽任力占射天輔六年領咸州烟火事天  
會十年改南京路軍帥司東南路都統司各爲都統移治東京  
鎮高麗授上京世襲猛安終東京留守弟胡實改子阿魯帶皇  
統初北伐有功拜參知政事 孫襄本名唯幼有志節善騎射  
多勇畧年十八襲爵大定初以本部兵謀衛討契丹窩斡戰

于肇州之長灤襄先登塵擊七戰皆勝足中流矢襄創而鬪奮  
氣愈厲謀術握其手曰今日之捷皆公力也賊走渡霧鬆河追  
及之所駐地多草賊乘風縱火襄立空地以俟戰十餘合賊益  
困襄勸謀衍今不乘此平殄後將有悔謀衍不從已乃復從僕  
散忠義追賊至陷泉率右翼身先奮擊賊大潰人馬相蹂而死  
論功第一特授亳州防禦使時年二十三宋人犯南鄆襄爲穎  
壽都統率甲士二千渡潁水敗敵兵五千復潁州生擒宋帥楊  
思次濠州宋將郭太尉退保橫澗山伏弩中其膝督攻愈急竟  
拔濠州獲郭太尉旣而趨滁州襄爲先鋒將至清流關得宋偵  
者知敵欲三道夜出掩我不備元帥志寧問計襄曰今兵少地  
隘儻不得關敵至我無所據必先取之又問我與若孰往襄曰  
元帥國家大臣詎宜輕動襄當爲公往取志寧趨之襄分兵爲



二道一由衝路自引千兵間道潛登既近清流敵始覺襄攻克之據其關志寧履行戰地顧謂曰克敵於不可勝之地真天下英傑也及宋乞盟班師名爲拱衛直都指揮使改殿前右衛將軍轉左衛出爲東北路招討都監遷速頻路節度使移曷懶路兵馬都總管在外任治有異効會志寧疾甚世宗臨問薦襄智勇兼濟有經世才他人莫及異時任用始勝于臣卽名授殿前左副都點檢使宋賀正生辰宋方祈免親接國書折其來議成禮而還累改陝西河南兩路統軍使賜尚服廐馬鞍勒佩刀經制邊事甚有統紀入爲吏部尚書奉公守法轉都點檢賜錢千萬上語宰執稱其蘊蓄難得遇非直口亦入宮規畫諸事乃退其公勤如此擢爲御史大夫以剛直聞踰月拜尚書右丞委以政機未幾進爲少師以褒賞廉吏詔天下列其名以示獎勵

二十三年拜平章政事封蕭國公皇孫將加王爵詔擇國號襄曰爲天下大計必先正其本原者本也請封原從之故事諸部族節度使多用乳人爲僚屬頗私縱不法議改用諸色人襄曰北邊雖無事恒須經畧若杜此門後有勞績何以處之請如舊便又議及監軍之事漢唐初無將得專任故嘗戰勝攻克叔世始監以內臣動爲所制後收多而功少若將得其人監軍誠不必置並嘉納之詔授北部進貢使選帝問邊事具圖以進因上羈縻屬部鎮服大石之策詔悉行之進拜右丞相徙封戴國公世宗不豫令宿內殿同受顧命章宗初政議罷僧道奴婢襄奏出家之人安用僕隸其寺觀物力元係奴婢之數並合除免詔從襄言由是二稅戶悉放爲良明昌元年坐膏上封事歷詆宰執克寧奏襄預知所言出知平陽移鳳翔歷西京留守同判大

睦親府事進樞密使復拜右相改封任國公屬邊事急命代清  
臣將佩金牌使空從事臨宴慰遣賜以貂裘安山緗鏡及戰馬  
二時胡正札亦叛嘯聚北京遣人招降之遂屯臨潢項之出師  
大鹽濼復遣右衛將軍完顏充進軍幹魯速城欲屯守俟隙進  
兵繪圖以聞密詔進討襄山西道支軍出東道至龍駒河爲阻  
鞞所圍求援甚急卽鳴鼓夜發嚮晨壓敵突擊之圍中將士亦  
鼓譟出戰獲輿帳牛羊衆皆奔幹里札河遣完顏安國追躡之  
衆散走會大雨凍死十八九降其部長遂勒勲九峯石壁捷聞  
上遣使厚賜撫勞賞賚士卒九月赴闕轉左丞相監脩國史封  
常山郡王宴慶和殿上親舉酒解所服玉貝佩刀以賜俾卽服  
之十月阻鞞復叛襄出屯北京至石門鎮密語僚屬此奚足慮  
第恐衆人乘隙而動北京近地軍少當亟爲備卽遣官發上京

等軍六千適羣牧契丹德壽陁鎖等據信州叛僞建年號衆數  
十萬遠近震駭果得其用襄因有備閑暇如平日人心乃安命  
臨潢總管烏古論道遠咸平總管蒲察守純分道進討擒德壽  
等送京師上遣問廷臣因亂議罷郊祀對以大禮不可輕廢請  
決行之臣計於祀前滅賊及是果如所料禮成進封南陽郡王  
上復許以承制除授辭言賞罰之柄非人臣所預不敢奉詔賊  
平請委近臣諭旨將士使知上恩乃遣李仁惠持自龍虎衛上  
將軍節度使以下宣三十勅百五十視功給之諸札有剽畧爲  
民患者慮其與德壽合移居近京地或謂恐生變矣曰札雖雜  
類亦我之邊民若撫以恩焉能無感後果無患尋詔叅政裔代  
領其軍入見賜錢五千萬內艱起復視事時議契丹戶驅奴尚  
衆乞盡鬻以散其黨襄奏其非便請量存口數餘悉官贖爲良

弘簡錄 卷二十一  
從之北部復叛奮戰失律仍命爲左副元帥莅師尋拜樞密使  
兼平章政事屯北京議民艱食減價出糶倉粟民大悅服時議  
北討奏遣宗浩出秦州夾谷衡出西北路以邀阻鞞而自帥兵  
出臨潢上從其策賜內庫物卽軍中用之其後斜出部族詣撫  
州降賜以寶劔專使臨問襄謂受之便詔度宐窮討令士自賞  
糧以省輓運進屯于沔移刺烈烏滿掃等山以逼之因請就用  
步卒穿壕築障起臨潢左界北京路以爲阻塞言者多異同復  
問方畧襄曰茲費雖百萬貫然功成之後邊防完固戍兵可減  
民力轉輸因以少寬實爲末利命親督視會歲饑募充以滂五  
旬而畢西北西南路亦如之無何秦州軍與敵接戰宗浩督其  
後殺獲過半諸部相率送款襄納之自是北陲遂定還軍臨潢  
減屯兵四萬馬萬匹以信符遣近臣迎勞于途復至第撫

問入獻邊機十事皆爲施行仍厚賜之復拜左丞相遣左司郎  
中阿勒根阿海降詔褒諭四年正月進拜司空素重厚寡言專  
務鎮靜守法每掾有所稟必問諸相云何掾對某相議如是旣  
而從之其事無有異者識者謂襄誠得相體朝議設清閑職位  
如宋朝宮觀使以待年高致仕者襄言朝廷養以俸廩恩禮優  
渥至老不退復有省會之法所以抑貪冒長廉節若擬別設恐  
涉于濫上表待罪上召翰林學士党懷英草詔罪已仍慰諭襄  
等視事泰和元年春承命馳禱于亳州太清宮及后土方嶽以  
其世封遠特改授河間府路筭木海猛安明年皇子生襄復自  
請報謝嵩嶽還次芝田之府店以疾薨年六十三訃聞輟朝遣  
使路祭葬依克寧禮諡曰武昭命張行簡銘其碑生平明敏才  
武過人所至有功臨潢駐軍有以僞書遺徒單鎰欲構以罪書

開土還界之其親信如此既而果獲爲僞書者在政府二十年  
總故事簡重能斷器局尤寬大待下吏盡禮用人各得所長  
爲當世明將相大安間配享章宗廟庭子思烈資性詳雅頗  
知書史自五六歲入宮充奉御甚見寵幸號自在奉御當宣宗  
入承大統胡沙虎跋扈時尚髻亂嘗涕泣跪抱帝膝願早誅權  
臣以靖王室帝急顧左右掩其口自是甚器重之後由提點近  
侍局遷都點檢天興元年汴京被圍哀宗命權鄧州行省參知  
政事以王渥爲左右司員外郎從行會武仙引兵入援與思烈  
論議不合仙以思烈方得君每假借之思烈謂仙本無入援意  
特以朝廷遣一參政召兵迫於不得已乃行耳渥勸曰仙大小  
數百戰經涉不爲不多兵事當共議思烈疑其與仙有謀幾斬  
之渥自以無愧於內不爲之懼已而率諸軍發自汝州過密縣

遇元兵不用武仙阻澗之策遂敗渥死於陣中京留守任守貞  
亦死上聞罷思烈行省以爲中京留守自留山領軍民十餘萬  
赴之無何大兵圍中京未能下崔立遣人監思烈子于東門下  
脅使招降思烈不顧令軍士射之旣而知崔立已將汴京歸順  
患病數日而死渥字仲澤太原人性明俊不羈博學善談論  
工尺牘字畫清美有晉人風少游太學長於詞賦登興定二年  
進士爲時帥奧屯邦獻完顏斜烈所知故多在兵間後辟寧陵  
令有治蹟入爲尚書省令史因使宋至揚州應對敏給宋人重  
之還爲太學助教轉密院經歷俄遷右司都事稍見信用  
胡石改亦宗室子與阿魯俱從太祖攻寧江州臨潢府戰達魯  
古城破遼主親兵皆有功遼軍來援濟州與其兄實古乃以兵  
迎擊敗之還攻濟州中流矢戰益力克其城軍中稱其勇從攻

春秦州降之并降境內諸部族其不降者皆攻拔之追遼主至中京獲其宮人輜重凡八百兩有思泥古部族復叛去追以兵五百及之獲其親屬部人以還德州復叛引兵五千克其城又從婁室擊敗敵兵二萬於歸化之南并降歸化取居庸關并燕屬縣及其山谷諸屯移失部既降復叛去引兵追及戰敗之俘獲甚衆澤州諸部有逃者皆追復之又敗叛人於臨潢誅其首領安撫其民天眷二年遷末定軍節度使改武定軍徙汴京留守天德三年授世襲猛安卒年六十八阿魯名宗賢太宗監國選侍左右甚見親信臨潢又叛從宗望復取之爲內庫都提點再遷歸德軍節度使政尚寬簡境內大治秩滿士民數千詣闕請留改武定末定二軍百姓皆扶老携幼送數十里悲號而去秉德廉訪官吏士民持盆水與鏡前拜言曰使君廉明清直

類此民實賴之秉德曰吾聞郡僚廉能如一汝等以爲如何衆對曰公勤清儉皆法則於使君耳因謂宗賢曰人謂君善治當在甲乙果然賢使君也用是超遷兩階天德初授世襲謀克馳驛召之雄州父老相率張青繩懸明鏡於公署老幼填門三日乃得去封定國公再除忠順軍賜以玉帶捕盜司執數人至獄已具再闞案察其有冤不數日賊果得人以爲神明改爲懶路兵馬都總管歷廣寧尹封廣平郡王改節崇義軍兼領北京宗室事正隆例奪王爵加金紫光祿大夫又改臨海軍大定初率諸宗室見於遼陽除同簽大宗正事封景國公致仕起爲婆速路兵馬都總管復致仕卒 撻懶年十六事太祖未嘗去左右出河店之役太祖欲親戰控其馬止之曰主君何爲輕敵臣請效力卽挺槍前手殺七人已而槍折復曳騎士九人下馬太祖

世之曰誠得此輩數十雖萬眾不能當也及戰于達魯古城遼兵一千陣于營外遣往擊之捷懶衝出敵陣大敗其眾攻臨潢府春泰州中西二京皆有功天輔六年授謀克天會四年從伐宋屢以功受賞明年再舉至汴宋人會諸路援兵于睢陽宗望遣與阿里剗將兵二千往拒之敗其前鋒軍三萬于杞縣又破三寨擒宋京東路都總管胡直孺南路都統制隋師元及其三將并直孺二子遂取拱州降寧陵復破二萬軍于睢陽進取亳州聞宋兵十萬且至宗望益以兵四千合擊大敗之其卒二千陣而立馳之不動卽麾軍去馬擊之盡殪擒其將石瑱而還帥府嘉其功賞資優渥宗輔駐兵熙州分遣諸將畧地捷懶以軍五百入六盤山十六寨降其官八十餘民戶四千獲馬二千疋皇統中累加銀青光祿大夫天德初加特進授世襲猛安卒年

六十五海陵遷諸陵於大房山以捷懶嘗給事太祖命作石像置虜陵前

婆盧火同時有二其一監婁室軍平陝西後爲平陽尹西南路招討使終慶陽尹此爲安帝五代孫舊居安出虎水後徙泰州爲都統賜耕牛五十伐遼時使徵廸古乃兵失期杖之後攻黃龍府與渾黜以四千人往助直懶里部產良馬太祖使婆盧火及子婆速俱爲謀克其部人辭勒罕轍字得兄弟先寇耶懶路穆宗令往討至阿里門河二人僞降遂畧馬畜三百而去復掠元勒部二十五寨太祖又令往討婆盧火渡蘇峽河招降旁近諸部因籍丁壯爲軍至特滕吳水執轍孛得殺之復破特鄰城執辭勒罕妻子遂降太祖取燕京宗望率兵七千前行銀木哥出居庸關婁室爲左翼婆盧火爲右翼大敗遼兵遂取居庸追

蕭妃已遠去獲其統軍察刺宣徽查刺并家族牌印就使領其所部後屢守邊有功太宗給以空名宣頭及銀牌并其子剖叔各賜衣一襲以甲冑賜所部諸謀克天會十三年加同中書門下平章事天眷元年駐烏骨廸烈地薨贈開府儀同三司諡剛毅以剖叔襲猛安爲泰州副都統子幹帶廣威將軍婆速官特進子吾札忽善騎射年二十以本班祇候郎君都管從征伐有功授脩武校尉皇統二年權泰州軍平陝西至涇州大破宋兵於馬西鎮超遷寧遠大將軍襲猛安復從宗弼權都統海陵伐宋契丹叛與德昌軍節度移室懣同討許以便宜從事大定初除咸平尹駐軍泰州俄改臨潢尹攝元帥左都監與廣寧尹僕散渾坦俱從元帥右都監神土懣率泰州兵及曷懶路兵千五百人解臨潢之圍時移室懣已死城中震恐神土懣與推官

麻珪輔國上將軍阿思懣繕完城郭表請益兵乘城固守契丹不能克遂引衆東行追及于窰歷山押軍猛安契丹忽刺叔以所部助敵來攻官軍失利泰州節度使烏里雅收兵未至臨潢與敵遇亦敗僅以數騎脫歸敵攻泰州四面登城勢大振城中震駭押軍猛安烏古孫阿里補率軍士循城應敵力戰斫刈其衆敵乃退泰州得完吾札忽使謀克蒲盧渾徙百姓旁邑及險阨之地以俟大軍明年聚甲士萬三千於濟州與神土懣俱從元帥謀衍敗窩斡於長濼戰霧霖河戰陷泉皆有功轉胡里改節度使卒爲人性聰敏有才智善用軍常出敵之不意故能以寡敵衆而所往無不克號爲鶻軍神土懣宗室贈銀青光祿大夫胡速魯改子年十五事太宗爲左奉宸皇統二年克護衛除武器署丞累官肇州防禦使以破窩斡功改曷速館節度使

弘簡錄 卷二百二十六  
終婆速路兵馬都總管

撒改上京納魯渾河人其先居兀冷窟河身長多力善用槍宗  
輔屬之麾下佩以金牌使督軍士天德元年授本班祇候郎君  
評穩後從軍泰州路以爲萬戶領銀木可等猛安戍北邊數有  
戰功海陵篡立遣使夏國諭以卽位因令伺彼之意旣還稱旨  
擢兵部郎中累會寧尹同知迭刺部族節度甌里本羣牧等使  
至曷懶路都總管伐宋授衛州防禦使總管武震軍世宗卽位  
遣使召至除昌武軍節度使又爲山東路元帥副都統復改安  
化軍大定四年徙鎮安武仍兼副統率山東大名東平三路軍  
八萬渡淮會大軍伐宋進至楚州宋遣使奉歲幣還邳州卒  
吾毋名卞與阿里刺俱上京司屬司人大定二年收克護衛積  
勞授彰化軍節度副使入爲都水監丞導河有勞遷累中都西

京路提刑使徙知歸德府河平軍節度使王汝嘉奏除北京留  
守未幾改知大興府事坐擅追攝左丞夾谷衡在軍不法以爲  
失體杖四十時御史大夫久闕左司諫赤蓋高門上言憲紀不  
振宐選剛正疾惡之人肅清庶務上乃用卞劾尚書孫鐸因賈  
鉉拜參知政事鐸對賀客誦唐張在詩有鬱鬱意坐以降黜懇  
乞休致遂以金吾衛上將軍致仕卒 阿里刺名膏大定十年  
以皇家近親收克東宮護衛轉十人長授御院通進從世宗幸  
上京會皇太子薨特命與滕王府長史臺馳驛往護喪且以膏  
親密可委令保護金源郡王遭此家難當以禮節其哀哭謹視  
食飲駕還遷符寶郎除吏部郎中坐犯夜禁奪官罷明昌元年  
起爲棣州防禦同知上書歷詆宰執復坐譏訕杖罷之還本猛  
安明年降授宣德州同知名爲武衛軍副都指揮使四遷知大



典府事轉左右宣徽使承安二年拜尚書右丞出爲泰定軍節  
度使移知濟南府卒 又梅堅塞吾屬司人三寶名奕大定七  
年以近親充東宮護衛十人長章宗卽位累遷左衛副將軍右  
副都點檢兼提點尚廐局使無過人才第以久次遷授未幾坐  
廐馬瘦決三十承安二年改左副都點檢兼職如舊俄授同簽  
大睦親府事卒爲人貪鄙數以賊敗帝愛其能治園場故進而  
委信之 崇成本名僕灰泰州司屬司人昭祖玄孫大定十八  
年收克奉職改東宮入殿小底轉護衛章宗爲原王充本府祇  
候郎君及爲皇太孫復任護衛卽位授河間府判官以憂去職  
起復爲宿直將軍累遷武衛軍都指揮使泰和二年卒爲人謹  
飭有守久侍近密宿衛二十餘年未嘗有過 又阿喜性廉能  
好學問襲父北京路筓栢山猛安聽訟明決人信而愛之提刑

司上其治狀除彰國軍節度副使改上京留守判官速平路節  
度同知歷海邳二州刺史皆兼總押軍馬宋統領劉文謙以兵  
犯宿遷迎擊破之復破戚春夏興國舟兵萬餘人斬興國於陣  
遷鎮國上將軍賜銀幣爲紇石烈執中前鋒渡淮破寶應天長  
二縣師還遷歸德府同知改泗州防禦使母憂起復大安二年  
改華州防禦使遷鎮南軍節度使貞祐二年知大名府充馬軍  
都提控歷橫海安化軍節度使充宣差山東路左翼都提控尋  
知濟南府事徙沁南軍節度河南統軍使兼昌武軍節度使卒  
舊史贊曰金自獻祖徙居海姑水納曷里村再徙安出虎水  
世祖稱海姑兄弟益指其所居也完顏十二部皆以部爲氏  
宣宗詔宗室皆書姓氏然亦有部人以部爲氏非宗室同姓  
者遂不可辨矣

